


釋史叢書之六

清代野

上海進步書局印行





# 清代野記卷中

梁溪坐觀老人編述

## 京師誌盜五則

京師雖輦轂之下。而盜風最盛。然盜亦有道。茲就所聞見者彙記之。西河沿西頭有一民家。僅寡婦孤女二人。其先亦小負販也。微有蓄積。女將嫁。母罄所有備嫁資。爲賊所偵。一夜踰垣入。將撬門矣。母聞之。呼女曰。外間有響動。莫非爾舅舅又來乎。爾舅舅以爲我有旨蓄。不知我寡婦孤兒之苦也。今既來。不可使其空過。爾將嫁衣。擲一件與之。免我母子受驚也。女如言。取新衣一襲。裹而擲窗外。曰。請舅舅以之質錢。爲賭本可也。我母子尙乞爾照應。勿迫我是幸。賊不言。持衣去。越日又聞踰垣聲。母復呼女曰。爾舅舅其以我爲魚肉耶。何不諒乃耳。因啜泣。賊在窗外曰。非敢再擾。來還賬也。前日吾等不知冒犯。甚歉然。今物在。是我去矣。言畢而逝。天明視階下一紙。

裏。卽所贈嫁衣。確由質庫出者。外一小紅封。簽書花儀二兩。下不署名。母女得之意。外喜可知也。

南橫街堂子胡同有住屋一所。頗軒敞。且有亭。蟲出簷際。可以遠眺。惟後牆外卽南下窪。居此者時遭鼠竊。遂久無人居。有王姓部曹者。家甚貧。貪其直廉。賃居之。一年夏間。獨坐棚下納涼。夜已深。尙未寢。忽見屋上火光一閃。如火刀擊火石狀。繼而忽聞屋上人語曰。火絨無矣。俯視下有人。以爲必更夫。或御者。庖人之類。京官宅中。此類之人多與賊。遂悄聲曰。朋友。賞一火抽袋煙。王卽以紙撚然。遞之。賊見王問曰。爾家主人寢乎。王曰。我卽主人也。賊大驚曰。小人該死。王曰。無傷也。夜深不成寐。得君夜談甚佳。因自述宦况。並所以賃居之故。賊曰。王老爺如此清苦。我輩斷不敢擾。請放心可也。王稱謝。且曰。君知之。君之儕輩未必皆知。設若光顧。無以爲敬。奈何。賊曰。我所居卽去此不遠。凡南路朋友。皆在此一方。我明日見之。當遍告。王又謝曰。無以爲敬。票十千一茶可乎。賊再三讓。不敢受。王曰。爲數本微。不過與君發利市耳。賊乃受。道謝而

去。自是王宅雖夜不門閉。亦無竊之者。王之字似人皆笑王有賊友焉。

光緒改元。予入都。應順天試。秋闈報罷。遂館于光稷輔侍御家。以待再試。時正季冬。予臥室爲廳事之東廂。一夜忽聞更夫與人語。但聞不白借三字。又聞答以曉得二字。以爲渠與同輩語耳。將黎明。忽聞院中有物墮地聲甚巨。亦不知何物。曉起。主人謂予曰。今日請爾啖賊贓。余問故。主人曰。昨夜有賊屋上過。更夫喝之。賊曰。借道者。更夫曰。不白借。至天明。遂以此物爲借道費耳。視之。玉田鹽肉一肘。重十餘斤。予乃恍然于所聞之語。乃更夫與賊語也。相與大笑。烹其肘。合宅遍享之。

京師有一種力役。名曰搨。音抗。平聲。肩。凡人家移居。或小家送嫁粧。皆若輩任之。一橫擔長不過尺餘。擔于肩頸之中。以方桌架其上。桌上陳設各物。皆如故。彼能以一肩之力。絲豪不致撞跌。雖貴重之物。置其上。皆不致遺失。亦北方一絕技也。由此達彼。雖經若干繁盛之區。流棍竊賊之徒。望即却步。匪特不竊。且助其憩息而上下焉。予嘗問其故。肩者曰。此物一上吾肩。若有失。吾輩力豈能償。若輩知竊物必害我。遭官刑。

故不竊。雖放膽置道旁。不懼也。予由南橫街移居青廠。曾用一次。果如所言。此則外省所萬萬不能者。

左文襄初次入覲時。寓善化會館。忽一日黃馬褂被竊。箚中朝珠及冬裘無數。且有銀數百兩。皆無恙。文襄大驚。乞步軍統領緝之。統領曰。此衣既不能衣。又不能質錢。竊之何爲。此必爾曾大言。故若輩顯其手段耳。不必緝捕。自當送還也。不數日文襄出門歸。見榻上置一袱。黃馬褂在焉。文襄舌橋不能下。

### 賭棍姚四寶

步軍統領。俗呼爲九門提督。緝捕盜賊賭博。是其專責。然京師遍九城。皆有賭坊。歲有例規。不肯捉也。所捉者。值得一二貴介子弟。或京外官之富有者。聚博于宅中。則彼宅自有通信之人。于是提督衙門番役出焉。俗呼番役至半夜圍其前後門。一擁而入。無一人能逃者。纍纍鎖至署。置班房中。聲言明早候堂官蒞署嚴訊。被繫者。乃以賄說大班。盈千累百。各具手條。畫押訖。付大班手。然後大班饗以盛筵。食畢。各歛

歛而歸。天猶未明也。有皖人姚四寶者。名敦布。伯昂總憲猶子。湖南巴陵知縣革職者也。無以爲生。恃賭爲活。無不勝者。一至賭坊。博徒視其所向而隨之。坊主大困。願日奉規例。請勿下注。姚於是月得千金。享用擬貴官。凡京師之雛伶名妓。皆父事之。一日者博于某宅。爲番役掩捕。雜貴介中繫之提署。番役志不在姚也。會諸貴介納賄。訖饗盛饌。姚亦在坐。僞醉而臥。須臾見諸人紛紛提燈出門去。姚僞臥鼾聲起。俄頃一役拍其肩曰。醒醒。可去矣。姚曰。何往。役曰。彼等皆去矣。爾亦可行。姚曰。爾逮捕時。不云明日候堂官訊辦賭棍耶。何爲而釋之也。我乃賭棍。必俟明日候訊。且並爾今夜所得之賄。某某若干。皆陳于官。役曰。爾慎也。耶。姚曰。我不慎也。公事公辦。固應如此也。役恫嚇之。姚大聲曰。爾輩不聞姚四寶名耶。鼠子敢爾。我一俟官長至。卽呼冤耳。役大懼。求勿聲。姚曰。分肥乃可。不得已。分以千金。姚乃挾金歸。出謂人曰。公等爲大班所食。予乃食大班也。由是京師無不知有姚四寶者。光緒初歸里。會沈秉成撫皖。姚往謁。沈乃伯昂總憲小門生也。待以世叔禮。姚携一僕鄉愚也。撫署號房間。

姚字僕以賊形二字示之。號房曰：無以此爲字者。爾誤也。僕爭執良久。繼而詢姚。乃字賦彤也。皖人傳爲笑談。

吳可讀尸諫

光緒己卯春三月下旬。予在京住潘家河沿。是日天朗晴明。予正午飯。忽見空中有白片紛紛下。亟至庭中視之。六出雪花也。瞬息卽化。炊許始止。不知烈日中何以忽然落雪。甚異之。數日卽聞吳柳堂侍御屍諫事。吳名可讀。甘肅人。由道光庚戌進士。部曹轉御史。以劾成祿言太激。左遷吏部主事。操行清潔。不附權貴。是年穆宗梓宮永遠奉安。吳乞派隨扈行禮。人皆以爲吳貧。冀博此數十金之車馬費耳。不意至薊州。遂密奏穆宗立後事。自盡于所居寺中。摺上。慈禧忽然天良發現。批云：以死建言。孤忠可憫云云。京師同官同年等。爲設祭于文昌館。挽聯無數。惟黃太史貽楫一聯最灑脫云：天意憫孤忠。三月長安忽飛雪。臣心完夙願。五更蕭寺尙吟詩。死時尙有絕命詩七律一首云：回頭六十八年中。往事空談愛與忠。坏土已成黃帝鼎。前星預



視紫微宮。相逢老輩寥寥甚。到處先生好好同。欲識孤臣戀恩所。惠陵風雨薊門東。吳居南橫街。卽以宅爲祠祀之。其尸諫之疏錄左。

吏部稽勳司主事。前任河南道監察御史。臣吳可讀。跪奏爲以一死泣請懿旨。預定大統之歸。以畢今生忠愛事。竊罪臣聞治國不諱亂。安國不忘危。危亂而可諱。可忘。則進苦口於堯舜。爲無疾之呻吟。陳隱患於聖明。爲不祥之舉動。罪臣前因言事忿激。自甘或斬或囚。經王大臣會議。奏請傳臣質訊。乃蒙我先皇帝曲賜矜全。旣免臣於以斬而死。復免臣於以囚而死。又復免臣於以傳訊而觸忌觸怒而死。犯三死而未死。不求生而再生。則今日罪臣未盡之餘年。皆我先皇帝數年前所賜也。乃天崩地坼。忽遭十三年十二月初五日之變。卽日欽奉兩宮皇太后懿旨。大行皇帝龍馭上賓。未有儲貳。不得已以醇親王之子承繼文宗顯皇帝爲子。入承大統。爲嗣皇帝。俟嗣皇帝生有皇子。卽承繼大行皇帝爲嗣。特諭罪臣涕泣跪誦。反覆思維。竊以爲兩宮皇太后一誤再誤。爲文宗顯皇帝立子。不爲我大行

皇帝立嗣。則今日嗣皇帝所承大統。乃奉我兩宮皇太后之命。受之於文宗顯皇帝。非受之於我大行皇帝也。而將來大統之承。亦未奉有明文。必歸之承繼之子。卽謂懿旨內既有承繼爲嗣一語。則大統之仍歸繼子。自不待言。罪臣竊以爲未然。自古擁立推戴之際。有臣子所難言。我朝二百餘年。祖宗家法。子以傳子。骨肉之間。萬世應無間然。况醇親王公忠體國。中外翕然稱爲賢王。觀王當時一奏。令人忠義奮發之氣。勃然而生。言爲心聲。豈能僞爲。罪臣讀之。至於歌哭不能已。已。儻王聞臣有此奏。未必不恕臣之妄。而憐臣之愚。必不以臣言爲開離間之端。而我皇上仁孝性成。承我兩宮皇太后授以寶位。將來千秋萬歲時。均能以我兩宮皇太后今日之心爲心。而在庭之忠佞不齊。卽衆論之異同不一。以宋初宰相趙普之賢。猶有首背杜太后之事。以前明大學士王直之爲國家舊人。猶以黃珙請二景帝太子一疏。出於蠻夷。而不出於我輩爲愧。賢者如此。遑問不肖。舊人如此。奚責新進。名位已定者如此。况在未定。不得已於一誤再誤中。而求一歸而不誤。

之策。惟有仰乞我兩宮皇太后。再行明白降一諭旨。將來大統仍歸承繼。大行皇帝嗣子。嗣皇帝雖百斯男。中外及左右臣工。均不得以異言進。正名定分。預絕紛紜。如此則猶是本朝祖宗以來。子以傳子之家法。而我大行皇帝未有子。而有子。卽我兩宮皇太后未有孫。而有孫。異日繩繩緝緝。相引於萬代者。皆我兩宮皇太后所自出。而不可移易者也。罪臣所謂一誤再誤。而終歸於不誤者。此也。彼時罪臣卽以此意擬成一摺。由前察院轉進。呈底奏底俱已就草。伏思罪臣業已降調。不得越職言事。且此何等事。此何等言。出之親臣重臣大臣。則爲深謀遠慮。出之疏臣遠臣小臣。則無干進希名。又思在諸臣中。忠直最著者。未必卽以此事爲可緩。言亦無益。而置之。故罪臣且留以有待。洎罪臣以查辦廢員內。蒙恩圈出。引見奉旨。以主事特用。仍復選授吏部。邇來又已五六年矣。此五六年中。環顧在廷。仍未有念及於此者。今逢我大行皇帝永遠奉安山陵。恐遂漸久。漸忘。則罪臣昔日所留以有待者。今則迫不及待矣。仰鼎湖之仙駕。瞻戀九重。望弓劍於橋山。魂依

尺帛。謹以我先皇帝所賜餘年。爲我先皇帝上乞懿旨。數行於我兩宮皇太后之前。惟是臨命之身。神志瞽亂。摺中詞意。未克詳明。引用率多遺忘。不及前此未上一摺之一二。繕寫又不能莊正。罪臣本無古人學問。豈能似古人從容。昔有赴死而行不復成步者。人曰子懼乎。曰懼。曰既懼何不歸。曰懼吾私也。死吾公也。罪臣今日亦猶是。鳥之將死其鳴也哀。人之將死其言也善。罪臣豈敢比曾參之賢。即死其言亦未必善。惟望我兩宮皇太后我皇上憐其哀鳴。勿以爲無病之呻吟。不祥之舉動。則罪臣雖死無憾。宋臣有言。凡事言於未然。誠爲太過。及其已然。則又無所救。言之何益。可使朝廷受未然之言。不可使臣等有無及之悔。今罪臣誠願異日臣言之不驗。使天下後世笑臣愚。不願異日臣言之或驗。使天下後世謂臣明。等杜牧之罪言。雖逾職分。効史遷之尸諫。祇盡愚忠。罪臣尤願我兩宮皇太后我皇上體聖祖世宗之心。調劑寬猛。養忠厚和平之福。任用老成。毋爭外國之所獨爭。爲中華留不盡。毋創祖宗之所未創。爲子孫留有餘。罪臣言畢於斯。願畢於

斯命畢於斯。再罪臣曾任御史。故敢昧死具摺。又以今職不能專達。懇由臣部堂官代爲上進。罪臣前以臣衙門所派隨同行禮司員內。未經派及罪臣。是以罪臣再四面求臣部堂官大學士寶鑒。始添派而來。罪臣之死。爲寶鑒所不及料。想鑒寶並無不應派而誤派之咎。時當盛世。豈容有疑於古來殉葬不情之事。特以我先皇帝龍馭永歸天上。普天同泣。故不禁哀痛迫切。謹以大統所繫。貪陳悽悽。自稱罪臣以聞。謹奏。

### 眉壽鼎進士

光緒己丑科會試之前。潘文勤公祖蔭。爲同鄉設送場宴。在座惟吳清卿中丞。非應試者。公所邀有江甯許鶴巢中翰。年高而鄉科又早。文名又籍甚。官中書門徒。甚衆。是日因腹疾辭。席間文勤謂衆曰。我新得一鼎。考其款識。乃魯眉壽鼎也。特刊爲圖說。以就正博雅君子焉。語畢。人各贈一紙。諸人亦不介意。吳清卿携歸置案頭。王同愈見而愛之。乞之去。及試期。文勤得總裁。二場詩經題。爲眉壽保魯。得圖者咸大悟。

撤去常解。以鼎話題。榜發中式八人。同宴者七。元和江標亦在其中。王同愈本不與宴。且中亞元得之意外。惟公所最屬意者在許。而許竟以疾不能赴宴。場事畢。公尙爲許惜也。許屢試不第。以內閣中書終。觀王許之得失。可見凡事有定數也。

輓聯彙志

會文正自詡善製輓對。茲錄其膾炙人口者。有門生婦死。公輓之云。親見夫子爲文學侍從之臣。雖死無憾。觀於人言謂父母昆弟無間。其賢可知。深得老師口吻。又介弟國華陣亡三河。公輓云。歸去來兮。夜月樓臺花萼影。行不得也。楚天聞雨鷓鴣聲。公其時正在鄂治軍也。不著一字。自然沈痛。又某御史輓伶云。生在百花先。萬紫千紅齊俯首。春歸三月暮。人間天上總銷魂。此聯久已傳誦。然以之輓妓。亦無不可。不如李芋仙刺史一聯云。參不透絮果蘭因。結局竟如斯。逝水年華悲夢斷。拋得下舞衫歌扇。逢場今已矣。落花時節送春歸。確切不移。的是才人之筆。栢文僖公葭。因戊午科場事被誅。時有人輓以聯云。其生也榮。其死也哀。雨露雷霆皆主德。臣門如市。

臣心如水。皇天后土鑒愚衷。於無可著筆之中。而落落大方。不著痕迹。可謂得體。

### 殘忍之果報

同治初。山東有餐館。售生炒驢肉。味極鮮美。其法釘四木椿於地。以驢四足縛于椿。不宰殺也。座上有傳呼曰。或臀或肩。沃以沸湯。生割一塊。熟而薦之。方下箸時。驢猶哀鳴也。館名十里香。極言其香可聞十里也。時長慶爲山東按察使。惡其殘忍。執肆主而殺之。遂絕。又有清江浦寡婦某者。富而不仁。嗜食驢陽。其法使牡與牝交。約於酣暢時。以快刀斷其莖。從牝驢陰中抽出。烹而食之。歲死驢無數。云其味之嫩美。甲於百物。吳清惠公時爲清河縣令。亦執而置諸法焉。噫異哉。食品之佳者甚多。何必肆其殘忍之舉。而供一己之口腹。宜乎其不容於世也。

### 回教之新舊派

嘗見西史新舊教之衝突。幾成莫解之仇。卒之新教近人情。人皆向之。舊教亦不得不漸相混合。豈知回教亦有新舊耶。回教有天經三十部。相傳穆罕默特所著。名曰

甫爾加尼。凡三十卷。六千六百六十六章。隋開皇時。始傳其教入中國。此舊教也。新教有閔煞力毛魯的兩經。言馬聖人爲華人鋸解以死。回民誦至此。則擗踊哭泣。按此事不見于紀載。甘肅河州有四大門宦之目。他屬所無。四大門宦者。一曰穆扶提。猶蒙古語之巴圖魯也。又名臨洮拱拜。一曰華寺。其中有舊教有新教。新教不薙鬚。令與鬚相埒。舊教則否。一曰白莊。以地得名。一曰胡門。以其始傳教者多髡。因以名其教。此外又有大拱拜。畢家湯拱拜。張門拱拜之屬。大拱拜最古。而胡門之起。不過五十餘年。拱拜者。以祀其始傳教之人。傳教者既有拱拜矣。而其子若孫。因得世其業。核力法者。爲門宦子孫之通稱。一麻目爲寺中之領拜。而<sub>音</sub>夾自副。<sub>字</sub>字書所無。俗讀若歌甲切。胡門一名紅門。大清順治五年。涼州回米喇印<sub>毛</sub>丁國棟叛。乾隆四十六年。循化新教馬明心蘇四十三。以仇殺舊教。因而作亂。四十八年。其黨伏羲阿渾田五復叛。咸豐同治年間。西寧寧夏馬化龍馬桂元叛。光緒二十一年。循化韓奴力叛。皆不久平定。回教中所謂罕植阿渾者。朝西域之尊稱。阿渾猶言塾師也。



攷乾隆四十六年。有諭旨禁習新教。（以上節采光緒二十三年河州知州楊增新  
通稟）

### 平捻冒功

同治六年十月。銘軍追捻賊于懋榆縣。有馬隊營官鄧長安者。其中表潘貴陞。久陷  
捻中。隸僞魯王任柱部下。月之上旬。逃歸鄧營。自矢刺任柱爲贄而投誠。鄧携之見  
主帥劉銘傳。劉諭以不必雍髮。如能得手。保二品官。賞二萬銀。十七日下午。銘中軍  
駐西門外。左右軍駐東南西南兩處。正造飯間。探報賊大隊由東南來。即拔隊迎擊。  
任柱親率大隊順城根來迎。劉師卽于西門外順城根擊之。當未交綏時。潘見任柱  
來。馳馬先迎之。任柱曰。爾何以得回。潘曰。有中表爲馬隊營官鄧姓者。保留得不死。  
又問何以不雍髮。潘曰。我僞對劉帥言。留髮以便出入兩軍間。勸大王降也。任又問  
劉帥現在何處。潘指從西來白龍長旗者。卽劉帥坐營。曰。任卽傳令攻之。潘出不意。  
奮手槍擊其背。斃焉。遂急馳回陣報劉帥。劉不信。以爲詐。將斬之。潘曰。且緩覘之。任

柱死。其隊必譁亂。若不譁亂。則任未死。大帥殺我未晚也。頃之賊隊果譁而退。左右兩軍合擊。大破之。追殺四十里。斬萬餘級。有黃旗馬隊善慶者。舊隸僧王部。王薨。遂隸劉戲下。其時亦順城根迎擊者。爭潘功以爲己功。得上賞。而潘僅得三品官。二萬銀。若據奏報之言。則死任柱者善慶也。非潘貴陞也。同時有僞衛王李永。僞曾王賴文光。皆被官兵擊散。永逃至舊縣。投李世忠。世忠縛獻安徽巡撫。斬之。賴文光逃至揚州。爲華字營統領。記名道吳毓蘭。擒斬之。

### 外人羨我科第

日本服部宇之吉。爲京師大學堂師範館教習。光緒三十四年戊申十二月回國。學部奏請賞給文科進士。奉旨依議。傳言服部自乞之也。猶憶光緒初年。總稅務司赫德二子。仰慕中國科名。納監入籍順天。且延名師攻八股。以期應試。至鄉試年。爲北皿號生羣起而攻之。乃不敢入場。嗚呼。彼時若當國諸大臣能通權變者。爲之奏請。特賜二舉人。一體會試。既不占鄉試皿號中額。又使外人入我彀中。豈不大妙。乃竟

聽其攻而去之。厥後李文忠知之。歎曰。朝中無人。朝中無人。誠然。

### 一夜造成之塔

乾隆間。帝南巡至揚州。其時揚州鹽商綱總爲江姓。一切供應皆由江承辦。一日帝幸大虹園。至一處。顧左右曰。此處頗似南海之瓊島春陰。惜無喇瑪塔耳。綱總聞之。亟以萬金賄帝左右。請圖塔狀。蓋南人未曾見也。旣得圖。乃鳩工庀材。一夜而成。次日帝又幸園。見塔巍然。大異之。以爲僞也。卽之。果甃石成者。詢知其故。歎曰。鹽商之財力偉哉。園遭粵寇之亂。已成瓦礫。而此塔至今尙存。

### 賣友換孔雀翎

乾隆帝之幸江南也。有內侍江姓者。精拳勇。號萬人敵。常侍帝遊幸。頗寵信。揚州綱總與通譜。結爲兄弟。骨肉至交也。帝還京後。江太監以竊宮中珍寶事逃去。勅下步軍統領五城查拏。江思暱我者。惟揚州綱總江某。往投當得保護。旣至揚。綱總大爲歡迎。設盛筵。欸之飲畢。邀至密室。謂曰。君事大不妙。我處耳目多。藏暱非計。不如逃

至海外爲佳。今奉黃金千。乘夜卽行。至某處海口。有我商號在彼。可設法也。遂以金屬江圍腰中。導至後門。出門外。乃甬道。夾牆皆高三丈許。旣出。卽聞闐門聲甚厲。江心動。恐甬道中有埋伏。乃一躍登牆。孰知上亦伏勇士數十人。見江上牆。挺擊而顛。縛而獻于巡鹽御史。奏聞。帝賞綱總布政使銜孔雀翎。同業中無不以爲至榮焉。蓋彼時鹽商中僅此一枝孔雀翎也。

觴令之解圍

乾嘉間。揚州鹽商豪侈甲天下。百萬以下者皆謂之小商。彼綱總者得嘻笑而呼叱之。有皖人方某者。名下士也。會試落第後。貧無聊賴。思得一館以餬口。遂有友人介紹于揚州鹽商汪姓家。安徽人。乃小商也。念鄉誼。又爲京官所薦。雖留之。不之異也。一日。綱總家大宴會。汪亦在坐。凡諸商宴集時。必各携一門客往。有觴政等事。可使之代也。是日。主人行飛字令。以詩中有紅字者飲。至汪。汪曰。柳絮飛來一片紅。衆大笑曰。此杜撰也。柳絮焉得紅。舉罰觴以進。方曰。諸公毋然。此明人詩也。吾居停不憶。

上句。故不與君等辨。非杜撰也。上句乃夕陽返照長隄外也。衆默然而罷。汪歸謝以千金。謂非君解此圍。則我爲衆辱矣。由是尊爲上賓焉。

### 城隍昭雪冤獄

光緒初年。河南鎮平縣盜犯王澍汶。臨刑呼冤一事。邸抄所載不甚詳。其時知鎮平縣者爲方某。少年進士而初任也。其事則尋常盜劫耳。案出時。見刑幕東塗西抹。與所供多不合。怪而問之。幕曰。我等皆老於申韓者。公讀書初出茅廬。不知其中玄妙也。方卽不敢再問。獄上決有日矣。是日縛澍汶赴市曹。監斬官撫標中軍參將。並開封知府唐某也。澍汶一出獄。卽大聲呼冤。檻車道出城隍廟街。不由人馭。直趨入廟中庭下而止。而澍汶仍呼冤不已。廟距撫署甚近。其時六安涂宗瀛爲巡撫。聞之。亟遣詢。乃命返獄中。另鞫。始知王澍汶爲盜首。眞者早遠颺。捕者獲其戀童。給之曰。官呼爾爲王澍汶。爾卽聽之。更教以供詞。且言澍汶已代爾謀出獄時。慎毋洩。及將斬。始知爲所欺。故呼冤不已。據唐太守云。是日事誠有異。御檻車者二人。竟不能制一

驟。驟直向廟中。亦不可解。豈冥冥中真有鬼神在耶。是案亦經刑部提訊。知縣方某。潘文勤門生也。文勤時掌刑部。詢其故。方因舉刑幕所言以對。文勤大怒。命逮刑幕。方革職。省中承審各員。皆獲咎有差。

### 戊戌變政小記

光緒二十四年歲次戊戌。清德宗皇帝銳意維新。用康梁之言。設新政府。以圖改革。天下之民。莫不引領以觀厥成。竊以爲中國之強。可計日待也。不料四十日卽推翻矣。新章京被斬矣。德宗被幽矣。西后復臨朝矣。漸至于庚子拳匪之亂。其不亡國者。幾希。余嘗舉戊戌變政之諭旨。及推翻後之僞諭錄而存之。俾後來者知當日之梗概焉。二十四年正月初六日。上諭給事中高燮曾奏請設武備特科一摺。着軍機大臣會同兵部參酌中外兵制。一併議奏。同日上諭。總理衙門遵議貴州學政嚴修請設專科一摺。據稱該原奏一爲歲舉。一爲特科。先行特科。後行歲舉。特科約以六事。一內政。凡考求方輿險要鄰國利病民情風俗者。二外交。凡考求各國政事條約公

法律例章程者。三理財。凡考求稅則礦務農功商務者。四經武。凡考求行軍布陣管駕測量者。五格物。凡考求中西算學聲光化電者。六考工。凡考求各物製造工作者。由三品以上京官。及督撫學政。各舉所知。無論已仕未仕。註明其人何所專長。在保和殿試以策論。嚴定去取。評列等第。覆試後。引見候擢。此爲經濟特科。以後或十年或二十年一舉。不拘常例。歲舉則每屆鄉試年分。由學政調取新增算學藝學各書院學堂高等生監。錄送鄉試。初場專門。次場時務。三場仍四書文。凡試者。名曰經濟科中貢士者。亦一體覆試。殿試朝考等語。仍着該衙門妥議具奏。四月二十六日上諭。徐致靖奏保薦通達時務人材一摺。康有爲。張元濟。著於本月二十八日預備召見。黃遵憲。譚嗣同。著送部引見。梁啓超著總理衙門察看。五月初五日上諭。前略。乃近來風氣日漓。文體日敝。所試時藝。大都隨題敷衍。罕有發明。而空疏者。每濫竽充選。若不因時變通。何以見實學而拔真才。自下科始。鄉會試及生童歲科各試。一律改試策論。一切詳細章程。該部卽妥議具奏。五月初八日上諭。前因京師大學堂爲

各行省之倡。特降諭旨。令軍機大臣總理衙門王大臣會同迅速覆奏。五月十六日。上諭總理衙門奏議覆御史曾宗彥奏請振興農務一摺。中略農務爲富國之道。是在地方官隨時維持保護。實力奉行。上海近日創設農學會。頗開風氣。著劉坤一查明章程。咨送總理衙門查核頒行。其外洋農學諸書。著廣爲編譯。以資肄習。五月十七日。上諭前略。各省士民若有新書。及以新法製成新器。果係足資民用者。允宜獎賞。以爲之勸。所製之器。酌定年限。准其專利。有能獨力創建學堂。開闢地利。興造槍砲各廠。有裨于興國殖民之計者。並著照軍功例。給予特賞。五月二十九日。上諭孫家鼐奏原任詹事府中允馮桂芬。邵廬抗議一書。最爲精密。著迅卽飭刷一千部。尅日送交軍機處。六月初一日。上諭張之洞陳寶箴奏請飭妥議科舉章程一摺。中略著照所擬鄉會試。仍定爲三場。第一場試中國史事論五道。二場試時務策五道。三場試四書義兩篇。五經義一篇。首場中額十倍錄取。二場三倍錄取。取者始准試次場。每場發榜一次。三場完畢。如額取中。其歲科試生童。亦以此例推之。先試經古一



場專以史論時務命題。正場試以四書五經義各一篇。至詞章楷法。未可盡廢。如需用此項人員。自當先期降旨考試。偶一舉行。不爲常例。嗣後一切考試。不得憑楷法之優劣爲高下。七月初三日上諭。前略。嗣後一經殿試。即量爲授職。至於朝考一場。著卽停止。下略。七月初六日上諭。總理衙門代奏主事康有爲陳請興農殖民以富國用一摺。卽於京師設立農工商總局。派直隸霸昌道端方。直隸候補道徐建寅。吳懋鼎等督理。端方著開缺。同徐建寅。吳懋鼎均賞三品卿銜。准其隨時具奏。下略。七月十三日上諭。湖南巡撫陳寶箴奏保人材。湖南候補道夏獻銘。黃炳離。前內閣學士陳寶琛。侍讀楊銳。禮部主事黃英采。刑部主事劉光第。廣東候補道楊樞。王秉恩。江蘇候補道歐陽霖。杜俞。柯逢時。江西候補道惲祖祁。湖北候補道徐家幹。薛華培。左孝同。均著來京預備召見。七月十四日上諭。近日臣工條奏。多以裁汰冗員爲言。中略。如詹事府無事可辦。通政司光祿寺鴻臚寺太僕寺大理寺等衙門。半屬有名無實。均卽歸併內閣及禮兵刑等部辦理。外省如直隸甘肅四川等省。皆係總督兼

管巡撫事。惟湖北廣東雲南三省督撫同城。原未劃一。現在東河在山東境內者。已隸山東巡撫管轄。祇南河河工。由河督專辦。著將湖北廣東雲南三省巡撫。並東河總督。一併裁撤。均著以總督兼巡撫事。河督卽歸併河南巡撫。至各省漕運。多由河運。河運所費無多。應徵漕糧。亦多改折。淮鹽所引省分。亦各分設督銷。其各省不辦運務之糧道。及向無鹽場。僅管疏銷之鹽道。亦均著裁撤。此外如各省同通佐貳等官。有但兼水利鹽捕。並無地方之責者。卽查明裁汰。其餘京外。猶有應裁文武各缺。著分別詳議。趕辦。至各省設立局所。名目繁多。虛糜不可勝計。著將各局所中冗員。裁撤淨盡。並將分發捐納勞績人員。嚴加甄別。限一月辦竣。七月十四日。裁缺八月十一日。復舊。計裁二十八日。七月十六日上諭。懷塔布據稱。禮部主事條陳。挾等制語。朝廷廣開言路。前經降旨。毋得拘牽忌諱。稍有阻格。若如該尙書所奏。卽係狃于積習。致成壅蔽。懷塔布著交部議處。王照原呈。著留覽。七月十九日。吏部議禮部尙書懷塔布。許應騷。左侍郎堃岫。徐會澧。右侍郎溥頤。曾廣漢。均著革職。王照賞

三品頂戴。以四品京堂用。七月二十日上諭。前略。著工部會同步軍統領衙門五城街道廳。將京城內外河道一律挑挖深通。並將各街巷修墊平坦。款由戶部籌撥。同日上諭。內閣候補侍讀楊銳。刑部候補主事劉光第。內閣候補中書林旭。江蘇候補知府譚嗣同。均著賞四品卿銜。在軍機章京上行走。參預新政事宜。七月二十四日上諭。孫家鼐奏請設醫學堂。考求中西醫學。當令大學堂兼轄。同日上諭。孫家鼐奏遵議徐致靖酌置散卿一摺。酌置三五六品學士各職。遇有對品之卿。並翰林對品缺出。一體開單請旨。同日上諭。刑部代遞主事蕭文昭請設茶務學堂。蠶桑學堂。著各督撫迅速籌議開辦。七月二十七日上諭。瑞洵奏南漕改折。並屯田裁併各摺。交奉勅孫家鼐會同戶部妥議。同日上諭。黃思永籌款設辦速成學堂。著卽如所請。籌款試辦。同日上諭。都察院代奏四川舉人陳天錫所請。將大挑教職。臚錄各項人員。於會試薦卷中挑取。及科甲候補人員。准其一體考差。同日上諭。中書祁永膺奏請將各省教職。改爲中小學堂教習。著詳議。同日上諭。刑部主事顧厚焜。呈請郵政

廣設分局。各省一律舉辦。著妥議。同日上諭。瑞洵奏稱於京師創設報館。繙譯新報。卽著創辦。以爲之倡。同日上諭。國家振興庶務。兼採西法。牧民之政。中西所同。而西人考究較精。故可以補我未及。中略。故日夜孜孜。改圖新法。豈爲崇尚新奇。乃眷懷赤子。皆上天所畀。祖宗所遺。非悉令其康樂。而親朕躬。未爲盡職。加以各國交通。非取人之長。不能全我之所有。朕用心之苦。而黎庶猶有未知。咎在不肖官吏。與守舊士夫。不能廣宣朕意。中略。今將改行新政之意。布告天下。使百姓咸喻朕意。上下同心。以強中國。朕不勝厚望。著查明四月二十三日以後所關乎新政之諭旨。各省督撫。均迅速照錄。刊刻謄黃。切實開導。各省州縣教官。詳切宣講。各省藩臬道府。飭令上書言事。毋得隱默顧忌。其州縣官。應由督撫代遞。卽由督撫將原封呈遞。不使稍有阻格。總期民隱盡得上達。督撫無從營私作弊爲要。此次諭旨。並著懸挂督撫大堂。俾衆共觀。七月二十八日上諭。上略。卽著各省督撫。傳知藩臬道府。凡有條陳。均令其自行專摺具奏。毋庸代遞。至州縣等官言事者。卽由督撫將原封呈遞。至士民

有欲上書言事者。卽由本省道府等隨時代奏。均不准稍有抑格。以上皆德宗銳意新政。切實講求之證。非若後來以新政塗飾天下耳目。藉便私圖也。至八月推翻之後。八月十一日僞諭。著將詹事府通政司大理寺光祿寺太僕寺鴻臚寺等衙門。照常設立。毋庸裁併。又凡有言責之員。自當各抒讜論。其餘不應奏事人員。概不准擅遞封奏。以符定制。又時務官報無裨政治。徒惑人心。著卽日裁撤。又所有官犯徐致靖。楊深秀。楊銳。林旭。譚嗣同。劉光第。並康有爲之弟康廣仁。著軍機大臣會同刑部。都察院嚴行審訊。八月十三日僞諭。榮祿著軍機大臣上行走。裕祿著補授直隸總督。所有北洋各軍。仍歸榮祿節制。八月十四日僞諭。康有爲實爲叛逆之首。著各省嚴密查拏。極刑懲治。梁啓超。狼狽爲奸。所著文字。語多狂謬。著一併嚴拏。康有爲之弟康廣仁。御史楊深秀。軍機章京譚嗣同。林旭。楊銳。劉光第等。與康有爲結黨。隱圖煽惑。情節較重。是以未候覆奏。于昨日諭令將該犯等卽行正法。八月十四日僞諭。已革翰林院侍讀學士徐致靖。著永遠監禁。編修徐仁鑄。著革職。永不叙用。十五、六

等日僞諭。左都御史著懷塔布補授。並授內務府總管。戶部左侍郎著徐會澧署理。  
（七月十九日黜。八月十五日復）二十日僞諭。溥頤補授內閣學士兼禮部侍郎。  
二十一日僞諭。湖南巡撫陳寶箴濫保匪人。著革職永不叙用。伊子吏部主事陳三  
立。招引姦邪。著一併革職。四品京堂江標。庶吉士熊希齡。庇護姦黨。暗通消息。均著  
革職永不叙用。並交地方官嚴加管束。十九日僞諭。李端棻卽行革職。發往新疆。交  
地方官嚴加管束。以上皆戊戌一歲中之事。至事十六年庚子夏。拳匪倡亂。親貴庇  
賊。致啓各國之釁。京師不守。兩宮播遷陝西。於是有十二月初十日敷衍變法之諭。  
去精神而求糟粕。愈變愈壞。人心愈失。以迄於辛亥十二月壽終矣。合觀前後各諭  
旨。前者令人歡欣鼓舞。後者令人怒髮衝冠。德宗變法。何等懇切。膾摯。西遷後之變  
法。僅欺飾人民而已。且不僅欺飾也。方藉此破格之名。而大開賄賂之實。在彼親貴  
方人人自爲得計。不知樹倒胡孫散。迄今日又從何處博得一文哉。尤可笑者。斥康  
梁爲叛逆。爲姦邪。懸賞購之。恨不卽日磔之。孰知異日僞行新政。仍不出康梁所擬

範圍以外。自古有如此無恥之政府乎。噫異矣。按戊戌新政雖未成。而德宗名譽已洋溢乎中外。泰西人至稱之爲中國大彼得。足徵其佩服深矣。愚以爲不有戊戌之推翻新政。必不致有拳亂。不有拳亂。革命事業無從布種。凡事莫不有因果。辛亥之結果。實造因乎戊戌也。

### 屬國絕貢之先後

京師舊有會同四譯館。在正陽門內東城根玉河橋。沿明舊地也。屋共三百餘間。專備外國貢使駐足之地。凡朝鮮琉球越南緬甸暹羅廓爾喀諸國。來者皆駐焉。以余所知而言。暹羅咸豐間尙入貢。嗣因粵寇作亂。海道不通。遂絕。琉球則於光緒六年滅於日本。越南亦於六七年間爲法人蹂躪。直逼其都。國主遣使臣入中國求援。居天津半年餘。時李文忠爲直隸總督。以其私訂條約。未曾請示天朝。不便保護。拒之。二使臣痛哭而歸。其實文忠不敢與法人開釁也。琉球尙世子亦在天津。每晨必長跪文忠轅門外。候文忠輿出。則作秦庭之哭。文忠每遣武弁慰諭之。如是者數月之

久亦痛哭而歸。緬甸之役。在乾隆朝本係敷衍了事。並未掃穴犂庭。執訊馘醜也。大兵僅達木邦而止。卽以木邦土酋爲王。與之訂十年一貢之例。至光緒八九年間。英人占據緬甸後。大爲整頓。至十三年。遂與我駐英公使訂緬甸條約矣。朝鮮則歲有例貢。海道距山東一葦可杭。然不准由海行。必須遵陸。渡鴨綠江。出奉天。過榆關。而至京師。迂道千餘里之遙。不以爲苦。彼國商人恒藉歲貢以獲大利。蓋以貨物雜貢品中。出入兩國之境。皆免稅也。以高麗蓆爲大宗。布次之。紙髮海味又次之。每月來。次年七月歸。以爲常。及爲日本所滅。而貢亦絕。於是四譯館鞠爲茂草矣。惟廓爾喀與前清相終始。至光緒季年。猶見邸抄中有入貢之事。彼國亦十年一貢也。

### 琉球貢使

清同治四年。余在常州。喧傳有琉球貢使過境。偕衆往觀。使舟泊西門外。接官亭下。久之。見二役舁一方箱。至一騎持名帖隨之。立岸上。大呼曰。使臣接供應。卽見使舟。有二人出。如僕隸狀。跪鷁首。向岸叩頭。亦大呼曰。謝天卽賞。於是二役卽舁箱入舟。



中亦不知何物。須臾。昇空箱隨騎者匆匆去。久之。武陽兩邑令呵殿來。輿立河干。兩令端坐不動。執帖者以名帖兩手高舉。大呼使臣接帖。於是正副二使臣出。至鷁首。向岸長跪。以兩手各捧一邑令之名帖。戴於頂。而口中自述職名焉。兩大令但於輿中拱手。令人傳免而已。不下輿也。禮畢。使者入倉。兩令亦呵殿歸署矣。郡守位尊。不往拜也。兩令之名帖。以紅紙爲之。長二尺。寬八寸。雙摺。居中的一行。大書天朝文林郎。知常州府某某縣某人頓首拜。字大徑二寸許。此余所目覩也。至所聞則更可異矣。琉球貢道。止准收福建海口。至閩後。卽須由內地前進。聞到閩後。浙閩總督有驗貢之例。是日總督坐大堂。司道旁坐。府縣則立侍案側。兩貢使手捧表文貢單。至頭門。卽跪。報名膝行而進。至公案前。以表文貢單呈驗。總督略閱一過。傳詢數語。卽命賜食。卽有一役以矮桌二置大堂口。酒肴亦續續至。二使者叩頭謝。乃就堂口席地坐而食之。各官仍坐堂上也。須臾食畢。復向上九叩首謝。恩畢。乃鳴礮作樂掩門。無私覲之禮也。琉球服裝。衣寬博之衣。腰繫大帶。寬尺許。以顏色分貴賤。冠亦如之。冠

似僧冠而稍高。惟足則中國之緞靴。蓋彼居本國皆赤足。惟入貢始靴也。其僕役則宛然戲劇中所扮蒼頭狀。一身皆黑。最易識別。攷琉球全國之地。不過中國一大縣。本無國王也。明洪武好大喜功。賜其土酋金印。封爲國王。又賜閩人善操舟者三十六姓以爲之輔。於是儼然一國矣。其時日本正當幕府時代。列藩分封。不相統一。琉球遂幸延國脈四百餘年。及日本推翻幕府。力行新政。回顧臥榻之下。有人酣睡。又非條約之國。遂一鼓滅之。夷爲沖繩縣矣。聞亡國之王爲世子時。曾在京師國子監肄業。徐小勿孝廉爲其教習。授以試帖詩。居然能工。逮歸國爲王後。常與臣下聯吟。亦不廢政事。惟貧小而弱。無力參兵。國之不國。不待日本之吞而始知也。

馬復賁越南使記

乾隆間征越南。擬治阮光平篡弑之罪。復黎氏社稷。會王師大敗於富良江。阮光平懼。中朝大舉復仇。遂卑詞乞降。帝因彼旣勝而降。遂亦許之。於是加封號。揮宸翰。恩禮稠疊。及光平來朝。復賜宴。賜詩。賜遊三海。待以隆禮。光平歸國。仍復不靖。時以我

國沿海盜舟。供其指使。劫奪商民。且封海盜爲提督總兵諸官。海疆官吏無可如何。黎氏殘裔歸國後。復爲阮光平所殲。中朝亦不過問。至同治間。法人開殖民地至越南。見其地勢沿海。土肥人蠢。思久據之。始而通商。繼漸逼入內地。時越南王告急於中國之書。不知凡幾矣。朝命李文忠派員前往。偵探實情。令下無人應者。有桐城馬復賁者。以應試不第。依其兄居天津。兄爲操江練船管駕官。忠裔也。復賁請於兄。願應募往。兄遂爲介紹於文忠。文忠大喜。許以歸來後。必專摺以薦。惟此時亦宜有職銜。乃立畀雙月候選同知執照以行。此同治七年事。復賁少有大志。好酒任俠。弛斥不羈。好讀書而不工舉業。嘗作乘風破浪之想。此行而願遂矣。其行程由內地廣西出鎮南關。終日行深箐密林中。虎狼之叫嘯。瘴癘之惡毒。一無所恐。隨役死二人。而復賁且無恙也。旣間關至越南。達中朝君相意旨。留其國者二年。於八年壬午冬。伴越南二使一范姓一阮姓者。來天津乞援師。文忠却其請。而越遂亡。文忠旋丁內艱。朝命合肥張樹聲署直督。文忠以復賁屬之。張已奏請以五品京堂用。已屬稿矣。會

有譖復賁於張者。言其酗酒狎妓事。遂不果薦。僅以同知終。文忠復蒞。亦無如何矣。嘻。以復賁之勇俠。使將一軍。頗足以伍絳灌。惜不遇知己。奈何。其在越南時。有致友人書一通。茲錄之以證當年之實事焉。書云。上略越土之廣。古交趾無是也。實由乾隆中。兼併占城。真臘二國而然。自是分爲南北二圻。乃得之未久。而南圻極南海濱。沃壤（即今之西貢也）爲法人侵占。同治十二年。法商以運械往雲南。道出北圻。東京（前黎王之舊都。爲彼國繁盛之城）羨其地之富。乘間攻取。法以數十人之力。數日之中。連下八省。都會。越人無計禦侮。其時雲廣與越交界隙地。土匪出沒於深山密箐中。劫殺邊民。內有劉永福者。廣東欽州人。素梟桀。有越官與相識。遂招其拒法。法受創。與越人成約而罷。因其地形險阻。民心未附。法遂幡然變計。陽尊以虛名。而陰收其利。越人爲其所愚。時當中國粵寇未平。未暇過問。數年以來。察地撫民。根深蒂固。一二年。前時有侵侮之事。越人噬臍莫及。復欲乞援於朝廷。而私與法人立約一節。顯背國法。自知未能蒙允。忍而不發。以至於今。劉永福自助越人擊退法兵。

後。該國授爲三省提督。駐紮宣光一帶。(在東京之西北與雲南毗連)設關徵稅。裕餉練兵。雖未必忠於越人。而仇視法人。實其本願。雲南自普洱臨安東至開化各府。皆與越交界。萬山重疊。路極崎嶇。內有大河三。一由蒙化東南流。歷元江。臨安至蒙自境。入越界。名元江。下流名洮江。東流六百里。歷越之宣光興化山西各省。至其東京。一由蒙化南流。名李仙江。又名把邊江。歷普洱思茅南入越之興化省。折而東流七百里。名陀江。亦至東京。北與洮江會。一由開化南流入安平。(名瀘江。卽古瀘水也)一入越界。下流名宣江。歷越之宣光山南流四百餘里。至東京。三江總匯。名爲富良江。一名珥河。又東南流三百餘里。分爲數十派。潑洄而東。入於海。此地形之大略也。劉永福所駐之地。卽洮江中流。雲越交界要隘。法之圖越也。實意在雲南礦產之富。若越之東京。則早已在其掌握中矣。第因永福積仇。扼守中路。道阻不通。從前法越約中。原載明通商中國雲南一節。今法人以永福旣爲越官。礙其通商之路。卽係越人背約。去年八九月間。法人定議先攻越南。故賁於十一月奉差赴越。傳語國王。

留其都城二十日。反覆筆談數萬言。今年三月初八日（壬午年事也）法陡興兵將東京攻破。其時賁適在彼。身入其中。彼此商辦。法人亦知理屈。仍將城池交還。越人賁卽飛請速派大員來此。大可補救。適合肥丁艱。張公署任。遂將此事東之高閣云。據余聞人言。劉永福之棄越投清。亦復賁之計畫。嘗詢之。而彼不承認也。嗟乎。以酬酒狎妓之微嫌。遂沒其困苦艱難之功業。中朝之賞罰不均。於此可見一斑矣。

## 緬甸訂約之失敗

緬甸既敷衍了事。後遂定十年一貢之例。逮英人破阿瓦都城。逐其國會。夷其宗社。而中朝尚復不知。於是有光緒十三年與英人定緬甸條約。茲錄之以證中朝自欺之笑柄焉。大清國大皇帝大英國大君主五印度太后帝。因欲固存兩國友睦。歷久不渝。並廣開振興。彼此人民通商。交涉事宜。茲由大清國特派管理總理各國事務衙門多羅慶郡王。總理各國事務衙門大臣工部左侍郎孫。大英國特派賞佩二等邁吉利寶星前署駐華大臣今美京頭等參贊大臣歐。將所議條款。開列於左。一因緬甸每屆十年。向有派員呈進方物成例。英國允由緬甸最大之大臣。每屆十年。派員循例舉行。其所派之人。應選緬甸國人。一中國允英國在緬甸現時所秉政權。均聽其便。一中緬邊界。應由中英兩國派員會同勘定。其邊界通商事宜。亦應另立專章。彼此保護振興。一煙臺條約另議專條。派員入藏一事。現因中國察看情形。諸多窒礙。英國允即停止。至英國欲在藏印邊界議辦通商。應由中國體察情形。設法勸

導振興商務。如果可行。再行妥議章程。儻多窒礙難行。英國亦不催問。一本約立定。由兩國特派大臣。在中國京城。將約文漢英各三分。先行畫押。蓋用印章。恭候兩國御筆批准。在於英國京城速行互換。以昭信守。光緒十三年二月初八日。奉旨依議。欽此。按第一條。具見英國外交手段。以虛名與中國。第二條。則實利歸己矣。第四條。更見狡猾。彼已與藏番連年開釁。藏恃地險。英恃砲利。互有勝負。未得便宜。意欲使中國飭令藏番降服。而又不肯明言。恐違公法。故隱約其辭。且示退讓。則中國與藏番。不得不入其彀中矣。彼總理衙門羣豕。烏得知之。

廓爾喀貢使

乾隆間。征服廓爾喀事。載之聖武記中。逮至英倫。見使署舊日檔案。始知廓當日舉兵。實非抗中國也。乃欲伐印度也。印與廓有切齒仇。久欲得印而甘心焉。自顧力量不足。擬借上國以爲助。其時譯音不通。廓之語言。又爲印藏夾雜之音。愈不能解。及見兵起。邊吏倉黃入告。乃命福康安征之。故一戰卽降。降後。上書於福康安。詳述由



廓入印山川道里甚悉。請發大兵收印度。願爲鄉導。福據以上聞。乾隆帝忽疑廓此舉爲復仇之計。將引我重兵深入腹地。聚而殲旃。不允所請。且其時正用兵西北。開闢新疆。亦無暇他顧。厥後英人之滅印度。亦廓爾喀導之也。惜哉。使當日移征新疆之師而收印度。則今日富甲地球矣。卽雅片亦無由而興。何有於禁九州鐵不能鑄。此大錯也。自是廓亦定十年一貢之例。光緒元年冬。余在京候試。忽市上喧言有外國入貢者。奇形怪服。非所常見。余亦隨衆往觀。見其由安定門大街過天橋入正陽門。而至四譯館止焉。貢品行李隨從及護送兵役約四五百人。其使臣二人皆衣滲金寬博之衣。皆紅紫色。冠皆如和尚所冠之毗盧帽。而中較高。上似有金繡之飾。各手一素珠。乘四人肩輿。無蓋無帷。如廟中神轎狀。大惑不解。明日見邸抄。始知爲廓爾喀也。相傳四譯館中。能廓語者。謹譯吏一人。語且不精。幸廓使能英語。遂以英語相酬答焉。至光緒三十一年。又見其入貢。絕不以中國貧弱而反顏。可謂有始有終矣。今則爲英之保護國。亦漸更其政俗。然其教則仍佛教也。

哲孟雄之幸存

印藏之間。又有小國名哲孟雄者。周遭僅中里七十餘里耳。本爲藏番部落。每由西藏入貢之期。亦附貢微物。聊以將意而已。英人欲通商西藏。必於達吉嶺開埠。爲轉輸停頓之地。欲開達吉嶺。必道出哲孟雄。遂力爭哲孟雄於總理衙門。以爲本係印屬小國。總署函致駐英公使。使爭之。於是星使命隨員各抒己見。有湖南新化人鄒代鈞者。爲鄒叔績太守漢勛之孫。輿地名家也。援古證今。原原本本。考據哲非印屬。呈星使。亦不置可否。以示總文案方培容。方字子涵。上元人。見鄒說。大聲曰。欽差如商量此等大事。不可委之書生。彼皆據悔國圖志及瀛寰志略等書。妄臆臆說耳。中國古書。萬不足恃也。旣英人欲得哲孟雄。不如與之。中國何在乎此。七十里小部落哉。星使亦不能決。方又曰。何不與馬參贊商之。星使以爲然。馬參贊者。英人馬格里也。自郭嵩燾奉使時。卽授馬二等參贊。藉以通兩國之情。馬雖英人。然忠於所事。並不助英以欺中。英人亦重之。及問馬。馬曰。容細查之。卽登樓覓鄒曰。君輿地專家也。

請據中國古書爲我考察。哲孟雄究奚屬者。鄒曰：已進一說於公使矣。馬卽詢星使。星使曰：方子涵云：中國古書恐靠不住。馬曰：是何言。中國書論中國事。猶以爲靠不住。豈外國書論中國事。反靠得住耶。取鄒稿去。卽據以譯成英文。而覆英外部焉。英外部亦無異說。乃照租借例定議而已。方在八股時代。頗有文名。不料一入仕途。頓喪其天良如此。

### 新加坡之記念詔書

余隨使泰西時。道出新加坡。其時中國總領事爲左秉隆。字子興。廣東人。京師同文館學生也。能通英法德三國語言文字。研究外交。頗有心得。曾惠敏公携之出洋。卽任以新加坡總領事。時觴余等於署中。見其書室中有畫龍竹筒十餘枚。皆長三尺許。兩端皆以蠟印封固。異而詢之。左歎曰：此皆歷年中朝所頒暹羅緬甸等國恩詔。哀詔也。製成後。循例頒寄。亦不計人之受與不受。代寄者大都皆以中國海商。一至新加坡。卽交與領事衙門。日積月累。遂有如此之多。使果寄至彼邦。彼亦必不承認。

反生枝節。不如留此以爲記念而已。繼又曰。英人已屢次請求一二幅爲博物院之陳列品。吾不敢也。

### 盜用巡撫印

同治中葉。湘南盜用巡撫印文一獄。幾搖動大局。幸知縣某精細。未釀大禍。先是長沙有名妓廖玳梅者。色藝冠一時。省紳某位尊而多金。矚之。欲納爲妾。廖不允。有外縣紳某者。亦矚之。其人家亦不貧。且少年美丰姿。廖久屬意矣。外縣紳每逢省中課書院必至。至時宿廖所。而屏省紳於門外。省紳頗銜之。一日外縣知縣某。忽奉巡撫密札一通。謂該縣紳士某某等六人。勾結髮逆餘黨。擬在省城作亂。已偵獲同黨多人。供證鑿確。卽將某某等六人密拏正法云云。令得此札。大驚異。蓋此六人。皆邑中清白公正之士。其中皆舉人五貢之類。且家皆殷實。文名籍甚。何致有悖逆舉動。遂商之刑幕。幕將院札閱數過。拍案曰。此文僞也。焉有督撫印文。而有監印官銜名者乎。公須親赴省垣。密商布政取進止。令乃行。謁布政。以情告。布政亦細閱撫札。不能

決語令曰。爾明日毋出面。俟我上院詢明後。再商辦法。次早布政入見巡撫。密問曰。如某縣某孝廉某拔貢者。非公書院門生耶。中丞曰。然是皆高才生。累列首選。吾甚刮目者。豈有所干求耶。布政曰。否。聞公欲殺此數人何也。中丞大驚曰。何來此言。孰誑爾耶。布政曰。有據在。乃出印文授之。中丞面色如土。頓聲答曰。印則是也。我何嘗爲此。布政乃述其由。中丞益駭曰。是不可不究。因嚴鞠署中男女僕婢等。有夫人小婢曰。某日有某賣婆來。似曾向夫人乞印文焚疏事。亟逮賣婆至。初不承。繼將用刑。乃哭曰。是省紳某賄我求夫人者。立命逮某紳。一訊而服。蓋省紳欲娶廖。廖意終不屬。省紳曰。爾屬意者。如目前暴卒。則奈何。廖曰。某若死。則嫁爾。省紳乃出此毒計。思假縣令手而殺之也。彼五人亦因公事與省紳齟齬。結怨甚深。擬一併除之。以爲快。於是案乃大白。廖逃至外縣。追捕監禁。賣婆與省紳皆擬斬。中丞夫人吞金死。中丞告病去。布政升巡撫。某令則調署大缺。以酬之。中丞劉琨。雲南人。布政李桓。江西人。其餘人名地名。當日告者皆詳之。今忘之矣。僅憶一妓一撫一藩耳。

### 巧對

曩在京師見有屬對之工者。輒記之。以資談助。麥秋至對桑春榮。三白瓜對萬青藜。青龍棍對朱鳳標。陶然亭對張之洞。獅子狗對熊伯龍。烏鬚藥對黃體芳。李象寅對楊猴子。赤奮若對未遁然。杜鵑花對李鴻藻。老板對童華。又樹已半枯。休縱斧。對果然一點不相干。以絕不相當之二語。集而成對。覺字字銖兩悉稱。可稱工妙絕倫。

### 古今事無獨有偶二則

吳翌鳳遜志堂雜鈔。引猗覺寮雜記云。某縣有尉。夜半叩令門求見甚急。令請待旦。尉不可。不得已披衣起。延尉入。問曰。事何急。豈盜賊待捕恐失時耶。曰否。豈有疾病倉猝耶。曰無。然則何急。曰某見春夏之交。農事方興。又使養蠶。恐民力不給。令笑曰。然則君有何妙策。曰某見冬間農隙無事。不若移養蠶於冬爲便。令曰。君策真非古人所及。奈冬無桑葉何。尉瞠目不能答。久之長揖曰。夜深矣。請安寢。閱此不覺失笑。古今事真有如出一轍者。光緒中葉。金陵有需次通判甘某者。司東台縣釐稅。每夜

必戎裝持械。携兵役遍巡城市。一夜巡至縣署前。已四更矣。叩署門請見甚急。令以爲火盜之警也。披衣起見之。問何事。甘曰無他。適已出巡遍城闈。恐君更出爲勞耳。故來告請安睡也。令曰吾早寢矣。公來始起也。甘亦惘惘而去。古今事無獨有偶也如此。

寄園寄所寄所載。明山西喬御史廷棟。起家進士。巡方三省。罷官家居時。每晨必具衣冠。升堂高坐。命僕役呵唱開門。以次伏謁。或作控訴狀。喬一一爲之剖判。訖然後如儀掩門。每日如此。聞者無不匿笑。不意今時亦有相類者。光緒間。有皖人張傳聲者。入貲爲河南候補道。加花翎二品銜。其面目癰腫有癡態。腹如五石瓠。食兼數人。需次汴省無差委。每日晨起。盥漱早食畢。卽冠珊瑚冠。孔雀翎。數珠補服。由內室而出。中門置一雲板。出則擊之。僕則高呼大人下簽押房矣。旣就坐。一僕進茗椀。一闈者持手版十餘如摺扇式。口稱某某等稟見。其實並無一人也。張則手舉茗椀作官腔曰。道乏罷。闈者斜步出。則又高呼曰。傳伺候。大人下來矣。張乃雅步登肩輿。出門

拜客矣。亦每日如是。如演劇然。此葉孝廉士芬爲予言。葉張之同鄉也。癸卯借汴闈報罷後。卽館其家。初見此狀。不覺大笑。以爲此公殆官癡也。張丁外艱。奔喪歸。死于中途逆旅中。

### 命名不可不慎

士大夫命名不可不慎。或貽笑柄。或誤功名。皆由于此。湖南游子岱方伯智開。應鄉試時名於藝。中式後。主司喬勤恪公謂之曰。爾名當改。游不悟。問何故。喬曰。爾歸閱日知錄。便知。游閱至黃幡綽敬新磨故事。乃恍然。遂更名智開。江西勒少仲中丞。應拔萃科時。名人璧及選貢學使者謂之曰。爾名當改。勒人之璧。是何行止。且璧與逼同音。旣勒人。而又人逼。非義也。乃更名方錡。應朝考焉。武進王頌平。大令國均。戊辰進士。書注甚佳。殿試已列入前十本。進早矣。及臚唱。太后聞之曰。好難聽。蓋王國均之音。與亡國君同也。遂抑置三甲。以知縣發安徽。被議改教職。爲山陽教諭。二十年。復以卓異選雲南某縣令。未之任而卒。潦倒終身。又曾文正公中鄉舉時。榜名子城。



字居武。余在京曾見是科鄉試同年錄。會試時座師命改國藩焉。此事近三十年。殆無人知之矣。若今之以國魂俠血等字命名者。更卑卑不足道矣。

### 驗方二則

治咽嗝奇方。用老蘇梗泡水和麪粉。俟日食時。在日中搓爲丸。須即日晒乾。丸皆中空。治咽嗝有神效。此理不可解。光緒二十二年丙申七月朔。日有食之。余日覩武進王仲光孝廉。在蘇州製此丸。中果空也。他時製之則不然。

龍眼

即俗名桂圓

核去黑皮。研極細末。治刀傷。立刻止血止痛。余見此方後。即手製約三

四兩許。久未有用。一日在金陵。見一木工誤以斧傷小童面部。血流如注。憶及此。與數之頃。刻血止。亦不疼。且能速愈。是亦不可解也。

小兒黃水瘡。潰爛出水。甚至不能坐臥。用風菱

即烏菱

壳燒灰。研末塗之。一二日即愈。

菱壳燒灰。愈陳愈佳。洞庭山所產尤佳。此極不直錢之物也。崑山張敬夫廣文芬傳。余此方。愈小兒甚多也。

### 光餅

蘇州市上有賣一種小麪餅者。大如錢。中有孔。可以索穿之。微甘而脆。名曰光餅。予童時嘗食之。咸豐間。制錢一文可購十餅。曾舉以問塾師。餅何以光名。師曰。想係光福人所創始耳。遂亦置之。不意越四十餘年。偶閱雷琳漁磯漫鈔。載錢唐吳中林詠光餅詩。始知餅爲戚繼光行軍時所作也。一事一物。莫不有其原始。信乎開卷有益哉。

### 誣妻得財

光緒初年。予留京過夏。有友人邀飲於肆。同座皆過夏者。藏鬪行令。極其歡洽。坐有一淮人曰。予不習酒令。今說一事。如諸君能解決者免飲。否則罰一杯。衆曰。可。淮人曰。吾淮某甲。一日晨起。將赴茶社小食。於途中拾得銀券一紙。視之。固素所交往之錢肆也。欣然往取銀。甫入門。已聞失主央肆主注銷求止付。而甲仍從容取銀去。失主不敢認。肆主亦不敢阻。是操何術以致此。諸人思之良久。皆不得其故。淮人曰。各

飲一杯。予言之。當甲挾券入肆時。見失主在肆。卽僞爲怒容。洵洵入。肆主向之點首。亦不答。肆主曰。先生清晨何怒爲。甲曰。不可說。不可說。家醜也。然吾兩人交情。言之何傷。予昨以事赴清江。今早歸。見予妻枕邊有銀券一紙。隨說隨卽取券出。擲案上。曰。是必予妻之姦夫所贈者。予將得而甘心焉。今姑取此銀去。會須偵之。肆主唯唯。目視失主。亦無言。連以銀與甲而去。同輩聞之。皆駭歎其狡詐而已。

### 回回賣猪肉

常州市有屠肆。一日有回教阿轟。自禮拜寺諷經歸。衣白布回衣。冠尖頂回冠。過屠門。適屠人執巨斧。据高砧斫猪首。血濺其身。阿轟大怒。將撻之。經市人調停。命屠賠償。阿轟堅索銀餅十枚。將行矣。屠人曰。銀旣與爾。衣當與我。且已爲血污。爾亦不能服之。歸家也。遂脫而與之。屠忿甚。擲衣於地。足踐而口詈之。一秀才在旁。睨之而笑。曰。是奇貨。可使倍價而贖也。屠猶怒不解。秀才曰。我非虛言。爾如聽我計。必能使之倍償。屠曰。若然。我但得原價足矣。餘皆與君。秀才曰。可。爾明早衣其衣。冠其冠。据案

賣肉。渠聞之必來觀。可惟爾所欲。屠如言。次日喧傳。一回人賣豬肉。皆來觀。阿轟一見更怒。勢將用武。屠曰。我以十圓買得者。爾豈能禁我不衣乎。何無理取鬧如此。觀者如堵。皆謂屠言直。阿轟無如何。願將昨所得者還之。求勿衣。屠不許。曰。非十倍不可。再三請。倍價贖歸。秀才曰。如何。欣欣然持十圓而去。此武進余益齋工部爲予言。

趙三姑娘

昆明趙蓉舫尙書光。長刑曹二十年。且累得試學差。又累次查辦外省案件。積貲至五六十萬。無子。祇生三女。長次皆早嫁早死。惟三女未字。趙沒後。尙遺財三十餘萬。皆三女掌之。嗣子所得甚微也。一日三女謁萬藕脰尙書青藜。曰。姪女年已逾三十矣。求年伯爲我擇壻。一須元配。二須少年翰林。三須海內世家。萬曰。難。會有儀徵胡隆洵者。以赤貧士入都。聯捷授吏部主事。萬之門生也。聞胡未婚。謂三女曰。胡某已如爾所約之半。如爾不願。我亦不敢過問。女不得已許之。遂涓吉成禮。胡一旦驟富。夫尊婦如帝天。婦視夫如奴隸。不待言矣。趙存日。有紅綠佩二事。皆大如掌。一則透

水玻璃翠。一則雙桃紅碧璽也。朝中大老無不知之。及三女嫁後。二佩歸於胡矣。胡一日佩之入署。衆皆屬目。一少年滿司員謂衆曰。明日當擲揄之。次日胡入署。此少年急趨至胡前。半跪請安曰。大人一向好。胡以爲誤也。連稱不是。不是。少年忽昂首曰。我適見雙佩。以爲趙大人復活矣。孰知是爾耶。衆轟堂大噪。自是胡不敢佩矣。三女歸胡後。未數年死。無子。胡再娶亦無子。及卒。以弟之子子焉。資財數十萬。米市胡同大宅。皆歸其弟矣。

### 王玉峯三絃

明秀水沈德符。做帶齋餘談所記。京師李近樓。幼以瞽廢。遂專心琵琶。其聲能以一人兼數人。以一音兼數音。嘗作八尼僧修佛事。經唄鼓鉦笙簫之屬。無不並奏。酷似其聲。老稚高下。曲盡其妙。又不雜以男音。一時推爲絕技。不意清光緒季年。京師有瞽者王玉峯。亦能以三絃作諸聲。並能彈二簧各戲曲。生旦淨丑。鑼鼓絃索。亦各盡其妙。尤神者。則作洋鼓喇叭。洋操兵步伐之聲。使遠處聞之。不知其出於三絃也。觀

於明之李近樓亦爲瞽者。可知瞽人心細。能體會入神。此等絕技。必間世而生。非有師傅。亦不能教人。玉峯上距近樓已四百餘年矣。五百年名世挺生。即微藝亦何莫不然。玉峯每於國忌齋戒等日。必奏技於正陽門外之廣德戲園。蓋是日不演劇也。聽者較觀劇倍之。價亦倍之。因此致富云。

### 麻瑞子空鐘

京師兒童玩具有所謂空鐘者。即外省之地鈴。兩頭以竹筒爲之。中貫以柱。以繩拉之作聲。惟京師之空鐘。其形圓而扁。如一軸貫兩車輪。其音較外省所製。清越而長。有覺羅旗人號快手羅者。精此技。久於金陵。以此爲生。遂致小康。然猶不如麻瑞子之出類拔萃也。麻瑞子亦旗人。而有痘癍。其姓瑞。以善空鐘得名。嘗奏技於東西兩廟集。及新年廠甸中。余曾見之。能以半段空鐘用繩扯之。飛高躍低。左盤右旋。無不如志。西人極詫之。謂兩輪去一。重心力已失。何以能圍轉如意。不致蹉跌。百思不得其解。乃歎中國人之絕技。固匪夷所思也。

## 端忠敏死事始末

清宣統三年辛亥四月。鐵路國有之旨下。起長白端方爲候補侍郎。督辦川漢粵漢鐵路事。先是己酉之秋。端由兩江總督調直隸。正慈禧太后梓宮奉安之日。於隆裕后行禮時。端之左右有以攝影器攝行禮狀。后大怒。以大不敬罪端。革職。抵任甫百日也。至是以親貴及諸大臣薦。遂起用。豈料禍機卽伏於此哉。端旣受命。於六月九日抵武昌。建行臺於平湖門外。勸路召匠。期于九月朔興工。而川人以川漢鐵路已奉先朝諭旨。歸商集費承辦。懇川督趙爾豐代奏。收回成命。不報。再三請。則以格殺勿論。恫嚇之。於是川之士民。焚香環跪。督署者數千人。大書德宗皇帝神位。頂於首而泣求焉。爾豐大怒。命衛隊銃擊之。死者枕籍。而川亂成矣。事聞於朝。電旨命端方率鄂軍入川平亂。七月下旬。端發武昌。率三十一三十二兩標兵以行。至宜昌。按兵候消息。端之意蓋不欲臨之以兵也。無何。朝旨嚴迫。不得已進至重慶。至重陽日。聞武昌事起。民軍已據武漢二城。蔭昌率京軍南下。亦敗退。端大恐。亟率師進至資州。

駐焉。朝命革趙爾豐職。以端代之。端知事無可爲。欲入都面陳機宜。兵大譁。時統兵者一爲曾廣大。一爲鄧某。皆端任鄂督時所拔之士也。於端皆有師生誼。又有營官董海瀾者。四川人。亦鄂之學生。當端之發武昌也。總督瑞澂力薦於端。謂可大用。端遂命董爲營官。隸曾廣大部下。當時廣大禁兵毋暴動。至十月朔。端行有日矣。布告軍士。謂已遣人至成都銀行借四萬兩。發本月之餉。並爲衆軍辦歸裝。衆怒稍息。至初五日。端束裝待發。衆以銀未至阻其行。並要挾書券。端與之。至初七日黎明。銀猶未至。衆謂誑我。於是董海瀾倡議入行館。驅端至側屋。云我輩將假爾室開會議。兵入室。遍搜行篋。無所得。即欲殺端。曾廣大乃宣言曰。端某非誑人者。彼欲行卽聽其行。何必殺。如贊成者舉手。乃舉者僅少數。曾又再三勸。兵皆洶洶。謂曾有異志。當先殺之。曾乃不敢言。大哭出。謂端曰。曾某不能保護。罪萬死。然迫於衆。實無可解免矣。其時兵皆舉銃待發。曾亟止之曰。此中尙有漢同胞無數。若滿人不過端兄弟二人耳。何爲玉石不分耶。衆乃逼端至行館大門一小屋中。亂刃交下。其弟端錦大罵。迫



之跪。不屈。亦亂刃而死。皆斷其首。曾廣大備棺斂之。欲並斂其元。衆曰。是將函至武昌者。不得斂也。乃卽日東下歸鄂矣。僚友僕從皆隻身分道遁。初八日。成都借銀至。已無及矣。遂爲紅十字會所得。先是端之議行期也。尙未得成都獨立信。至初五日。資州牧以省電告。遂決意還京。資州衆紳環而請曰。公母行。公若反正。則成都唾手可得。即衆亦必以成都督舉公。且公之兵所以譁囂者。以公不反正也。若一變計。則皆爲心腹矣。端不可。衆紳又請曰。公如慮成都不能容。則卽於資州樹白幟。某等可函致省紳。來資州擁公爲主。公幸勿疑。端歎曰。我果如此。何以對慈禧太后。德宗皇帝於地下哉。我計決矣。君等毋爲我慮也。皆太息而散。端自入資州後。無日不作還京計。使早日行。亦可無事。乃一因借銀未至。二因有投誠土寇周姓。約初四日率衆來降。遂待之。不料初五日一聞川省獨立之信。而禍不旋踵矣。端之至重慶也。凡南北公私函電。及從官信牘。皆爲軍士所遏。不得達。是以沼江各省響影反正之舉。一無所聞。蓋至死僅知武漢之事而已。死事聞。贈卹如例。特謚忠敏。此殆清廷最後之

予諡矣。其監印官李寅生。於十一月望日間。關至上海。爲予言如此。又聞某君云。端方陰謀不測。革黨深忌之。當其督鄂督江時。凡黨中魁傑。爲其所離間者。不知凡幾。屢欲起事。均爲所敗。使其久督畿輔。則革命事業。不得成矣。清有長城如此。而顧以微瑕黜之。此清之所以亡哉。端爲人無赫赫之威儀。好嬉笑諧謔。而中無城府。待故舊甚厚。好藏古物。生平宦橐。皆耗於此。及罷官閒居。猶坐客常滿。尊酒不空。亦近代大吏中之風雅者。非某君言。不過以畢鎮洋阮儀徵視之耳。嗟乎。瑞澂輩誤國殃民。罪魁禍首。竟逃顯戮。獨端方不保首領。豈天之欲成其名耶。

阿肌酥丸

京師黃敎喇嘛治病之藥。有所謂阿肌酥者。丸藥也。形如菉豆。作丹砂色。又名子母丸。分牝牡二種。以牝牡二粒。置淨瓶中。嚴封其口。供養於淨室中。每日清晨焚香咒之。至四十九日。則滿一瓶。取治百病。據云無不效者。余昔年寓光稷甫侍御家。曾見之。乃一宗室顯者所贈。光氏雖得之。亦不敢用也。

## 女統領

清同治初年。有皖人朱某者。讀書應試。年逾冠。不能青一衿。忿而從軍。爲書記。展轉數年。隨大軍度關隴。隸統領陳姓麾下。統領者。記名提督巴圖魯也。朱年少美丰姿。爲人亦和藹。統領甚倚重之。諸同僚不如也。一日者。統領忽獨召朱夜飲。留與同榻。朱不肯。拔刀將殺之。不得已。從之。及登床。孰知統領乃女子。猶處女也。大樂。朱由是夜夜皆宿統領所。同僚皆鄙之。皆以朱爲統領龍陽矣。久之。統領腹漸大。將產矣。大懼無策。又不敢冒昧墮胎。商於朱。朱慫恿直言。稟太帥。時左文襄公督陝甘。朱且舉木蘭故事。謂必不見斥。從之。文襄得稟。大驚異。將據實奏聞。幕僚曰。事涉欺罔。恐朝廷見罪。不如其已。於是命朱襲陳名。統其軍。而陳於是易弁而釵矣。後朱從征回逆。請歸宗。更納二妾。陳大怒。挾其貲財。與所生之子。居甘肅省城。遂與朱絕。考陳之由來。則當同治初元間。將軍多隆阿由湘入陝時。道出荆子關。軍中募長夫。有童子應募而來。面黧黑而多痘癍。且碩大多力。人不料其雌也。初入營牧馬。繼拔爲兵。屢建

奇功得洊升至記名提督巴圖魯。雄飛十年。一旦雌伏。奇矣。此江夏范嘯雲游戎爲余言。范其時亦從軍關隴間也。此事若付之管絃。播之聲歌。安見紅氍毹。上不演出。一剛健婀娜之佳人哉。誰復憶其黑面且麻之蠢女也。

### 奇姓

李文忠督直隸時。有部將姓者名貴。雲南人。生長於合肥。有知其歷史者。謂其高曾有因事發配至合肥。遂家焉。貴孩提即失怙恃。亦不自知其姓。稍長應募爲兵。募者問其姓名。答以不知。募者笑曰。之乎者也。皆可爲姓。爾即姓者名貴可也。以功洊至記名提督巴圖魯。補通州協副將。范嘯雲游戎曾隸其麾下。爲余言如此。從此萬姓統譜。又增一奇姓矣。

### 意外總兵

清同治間。湘淮軍興。削平髮捻。回諸大亂。各路軍功。所保記名提督。部冊所載。近八千人。總兵則近二萬人。副將以下。汗牛充棟矣。故提鎮大員。欲得實缺。非督撫密保。

不可。有桐城人陳春萬者。農夫也。多力而膽大。同治初年。入湘軍爲兵。隨大軍轉戰至關隴。亦保至記名提督巴圖魯黃馬褂矣。左文襄頗喜其勇。然以其無智慮。又不識字。十年來位不過營官而已。營官只帶一營五百人也。不但無簡任之望。並數營統領亦不可得。鬱鬱不得志。文襄既出關。陳營又裁撤。更無聊賴。貧不能歸。迨文襄班師回任。陳欲往面求一差委。及見文襄。即向之稱賀。陳曰。標下來求中堂賞飯喫耳。何賀之有。文襄曰。爾尙不知耶。爾之印較我印大且倍也。陳愈不解。文襄乃命設香案。命陳跪聽宣旨。始知已特簡肅州鎮掛印總兵。廷寄到已數日。正覓其人不得也。清制。掛印總兵。體制尊崇。與尋常總兵大異。准專摺奏事。不受總督節制。如宣化鎮總兵。乃挂定邊左副將軍印之類。當時文襄頗疑陳密求李文忠而得此缺。甚忌之。蓋因肅州鎮出缺時。例由文襄奏報。卽隨摺保二人以進。而皆未用故也。後始聞內廷人言。是日軍機開單呈請簡放時。帝筆蘸朱太飽。未及見文襄所保之人。而硃點已滴於陳名之上。帝曰。卽此可也。陳實得之意外。不二年謝病歸。終不能安於位也。亦范嘯雲

言。

### 孔翰林出洋話柄

清光緒丙戌曾惠敏公紀澤由西洋歸國。忿京曹官多迂謬。好大言。不達外情。乃建議考游歷官。專取甲乙科出身之部曹。使之分游歐美諸國。練習外事。試畢。選十二人。惟一人乃禮邸家臣之子。非科甲。餘皆甲乙榜也。游英法者爲兵部主事劉啓彤。江蘇寶應人。刑部主事孔昭乾。江蘇吳縣人。工部主事陳熾唐。江蘇江陰人。刑部主事李某。山東文登人。命旣下。李與陳皆知劉久客津海關署。通習洋情。遂奉劉爲指南。聽命惟謹。孔獨不服。謂人曰。彼何人。我乃庶常散館者。豈反不如彼。而必聽命於彼乎。隨行兩翻譯。皆延自總理衙門同文館者。亦惟劉命是聽。孔愈不平。所言皆如小兒爭餅果語。衆皆笑之。一日者。行至意國境。船主號於衆曰。明日有東行郵船往上海。諸君有寄家報者。可於今日書之。於是皆報平安。次日晚餐。席上忽無牛肉。蓋四行已浹旬之久。牛適罄也。孔忽謂劉曰。船主私拆我家信矣。劉曰。何以知之。孔曰。

我家世守文昌帝君戒。不食牛肉已數代。及登舟。每飯皆牛。嘗不得飽。昨於家書中及之。今忽無牛肉。是以知其拆閱我家信也。劉笑曰。船主未必如此仰體尊意。公自視太尊貴矣。且船主未必識中國字。拆信何爲。况歐人以私拆人信爲無行乎。公何疑及此。孔指二舌人謂劉曰。彼中國人也。何以能識洋字。安保船主不識中文耶。劉嗤之以鼻。及抵英倫。以舌人不聽。彼使令遍訴於使館中人。初不知其有神經病也。凡游歷各廠各要塞。皆劉語舌人。按路之遠近。爲游之先後。一日游阿模司大礮廠。見所鑄礮彈。有長三尺許者。羅列無數。孔問舌人。以礮彈對。孔大怒曰。爾以我爲童騃耶。礮彈乃圓物。我自幼即見之。此明明是一尊小礮。何云礮彈。舌人亦不答。凡經游之地。其門者皆有冊請留名。孔必大書翰林院庶吉士。劉每笑而阻之。孔謂是妬。大不懌。久之使館中人。皆知其有神經病矣。彼所言或勸之。或不直之。孔鬱愈甚。而病發矣。一日忽具衣冠書狀呈公使。大聲呼冤。公使命人收其狀。而却其見。視其狀。則皆控劉語。大可噴飯。閱數日。見公使無動作。遂竊同伴之鴉片膏半茶甌。全吞之。

復至厨下覓冷飯半盂。咽而下之。人初不知。及毒發。衆詢之。自言如此。急覓醫診救。已無及矣。至夜半斃焉。床頭有遺書一通。上公使者。略云。劉將殺我。前日引我至蠟人館。指所塑印度野蠻酷刑相示。是將以此法處我也。我不如自盡。免遭其屠戮之慘。並乞公使代奏。爲之理枉云云。於是倫敦各報館。大書游歷官自盡。所言皆一面之詞。幸公使及衆人皆知其由。不然。劉受其累矣。孔死後。公使奏請給卹如例。並函致其父述其情。其父歎曰。是兒素有痰疾。其卿試落第時。亦曾作此狀。幸防護周至。獲免。今又犯此病而死。是乃命也。於劉乎何尤。時余亦隨使英倫。親見之。悉其詳。

聯語無偶

京師士夫好作聯語相譴。至今相傳有二聯無屬對者。大興劉位坦有壻三人。人爲之語曰。劉位坦三位令坦。吳福年。喬松年。黃彭年。吳錢塘人。道光乙巳探花。未開坊而卒。喬山西徐溝人。由進士部曹歷任封圻。終於東河總督。謚勤恪。黃貴州貴筑人。亦由進士歷官至江蘇布政。護巡撫。三公皆顯貴。而當擇配時。則皆未第也。又昆明



趙蓉舫大司寇光之次女。爲桐城光稷輔侍御繼室。京師爲之語曰。趙光之女光趙氏。二語皆無屬對者。

### 謔吟召釁

有泰州王某。同治甲子舉人。以部曹而爲軍機章京。一日入直至半途。忽摸項下忘掛朝珠。遍索車中亦不得。時已入正陽門。勢不得回宅。蓋夜半開城。只許入不許出也。不得已。憶東城有好友浙人汪某。可往假之。驅車往叩門。汪已寢。聞王至。亟起。王告以故。卽入取珠出。且曰。吾較爾長大。吾珠恐不合用。茲以內子所用者假爾用之。王致謝。且戲吟曰。百八牟尼珠一串。歸來猶帶粉花香。此乾隆間京師譏某相義女詩也。汪聞立變色。返身入內。王亦不俟其送。卽匆匆出。甫上車。見汪氣洶洶。手白刃出。大罵曰。爾如此污蠱我。誓與爾不共戴天。王亦不解。急驅車去。汪猶追及。斫車尾而返。次早汪復握刀至王所居巷口。俟之。晝夜不懈。致王誤班數日。王後詢于人。始知所吟詩。卽當時刺其祖母之詩也。嗣以汪尋仇不已。遂謝病歸。終身不入京。

### 吃飯何須問主人

楊州李某亦軍機章京也。每下班必至東華門外戶部王宅午飯。無論主人在家與否。蓋李與王同年至好也。一日李因病請假數日。假滿復入直。及下班擬仍至王宅午飯。甫入門。一僕半跪擋駕。李曰。爾新來僕耶。爾不識我耶。僕曰。誠新來者。李曰。我李某也。爾主既不在家。卽稟爾主母備午飯我食也。僕以告主母。意必夫之至交也。具盤殮焉。李據案大嚼。未已。主人歸。李視之不識也。手一箸幾無置處。寤不可言。主人曰。久聞公名。公與前主人王某同年至好。我與王某亦至好。同姓同官又同司。前主人已於二日前移居外城。遂以此宅與我。故一切門封門榜皆無須更換也。公既可在前主人王某處午飯。何不可在我處午飯。相與共啖甚歡。嗣是下值午飯亦如曩例。前王聞之。大笑曰。不圖此宅乃爲李某噉飯所。奇矣。

### 旗主旗奴三則

覺羅炳成。號半聾。八旗老名士也。與桐城光稷甫侍御莫逆交。裕庚者。亦光之世交。

晚輩也。炳無三日不在光所。裕自英果敏罷廣督後。始携眷居京師內城。亦偶至光宅。一日會食。光坐裕于炳之上。以裕疏而炳親也。食時。炳與裕不交一言。食畢。炳忽謂裕曰。爾今日短一過節。我因在漢官家。不便挑眼。裕唯唯謝罪。翌日。半聾語予曰。凡各項包衣。並小五處旗人。或奴籍。或重臺。例不得與宗室覺羅抗禮。若必不得已。必先半跪請曰。求賞一坐。然後坐。方爲合禮。裕庚乃漢軍小五處包衣。旗必先須請命而後坐。裕欺我不言。故詔之。予笑曰。公等旗人。過節太多。半聾又曰。每有旗主貧無聊賴。執賤役以餬口。或爲御者。或爲喪車槓夫。或爲捐肩者。京師市上有一種人。運雜物。謂之捐肩。若途遇其奴。高車駟馬。翎頂輝煌者。必喝其名。使下車代其役。奴則再三請安。解腰纏以賄之。求免焉。故旗奴之富貴者。甚畏見其貧主也。

嘗聞道光間。有旗人官兩淮運使。其妻與揚州知府妻往來。知府漢人也。一日知府妻欲宴運使妻於署。以不諳待滿人禮。覓一滿婦爲陪客。遍查同城官眷。惟參將標下中軍守備係滿人。且世家子。遂往拜致意。守備妻慨允之。屆期。盛筵以待。守備妻

絕早至日中。運使妻至。守備妻據坑南面坐。傲不爲禮。主人訝之。運使妻一見。即雙膝跪安。守備妻曰。今日主人賞爾飯。不必拘禮。可坐下。運使妻又雙跪謝。然後坐。及席設。知府婦推運使妻首坐。守備妻曰。今日我在此。彼不便坐。我代坐可也。運使妻爲之送箸斟酒。侍立于側。若奴隸然。守備妻曰。爾不可拂主人盛情。權坐下同啖可也。又請雙安始就坐。局促至不敢舉箸。而守備妻則據案大啖。席散客去。守備妻欣然。運使妻悻悻然。知府妻則皇皇然。不明其故。繼聞人言。守備妻爲旗主。運使妻旗奴。奴自不敢與主抗禮也。知府亟趨謝罪。而運使終以此存芥蒂焉。

又道光朝大學士松筠秉政。上甚倚重之。忽請假數日。上不之異也。次日軍機召見。奏對畢。上忽問曰。松筠何事請假。一滿軍機對曰。因該旗主家有白事。滿人謂喪事爲白事松筠照例前往當差。上曰。汝往視之。如無甚要事。可命其早日銷假。滿軍機銜命往。至則見松筠摘纓冠。身白袍。坐大門外。司鼓。滿軍機傳旨訖。次早。而奏情形。上大怒。謂該旗主有意侮辱大臣。即日降旨拾松旗。免其奴籍焉。

## 武英殿版之遭劫

清初武英殿版書籍。精妙邁前代。版片皆存貯殿旁空屋中。積年既久。不常印刷。遂爲人盜竄無數。光緒初年。南皮張文襄之洞官翰林時。擬集貲奏請印刷。以廣流傳。人謂之曰。公將興大獄耶。是物久已不完矣。一經發覺。凡歷任殿差者。皆將獲咎。是革數百人職矣。烏乎可。文襄乃止。殿旁餘屋。卽爲實錄館供事盤踞其中。一屋宿五六人。三四人不等。以便早晚赴館就近也。宿于斯。食于斯。冬日炭不足。則劈殿板圍爐焉。又有竊版出。剗去兩面之字。而售于廠肆刻字店。每版易京當十泉四千。合制錢四文板皆紅棗木。厚寸許。經二百年無裂痕。當年不知費幾許金錢而成之者。乃陸續毀于若輩之手。哀哉。文淵閣每年伏日例須晒書一次。十餘日而畢。直閣學士並不親自監視。委之供事下役等。故每晒一次。必盜一次。亦有學士自盜者。惟所盜皆零本。若大部數十百本者。不能盜也。究其弊。皆以國爲私之病。不公諸民而私諸官。不知官流轉無定者也。民則土著占籍累世不遷者也。觀東西洋各國博物院藏書樓

等皆地方紳士管理之。不經官吏之手。故保存永久焉。

### 破題僅兩句

河南懷慶府河內縣有郝姓者。爲糧店管事。店主有子以賄入泮。至鄉試年。復欲以賄鄉舉。命郝輦金至省城。覓搶替焉。郝因其資亦納監。倩人代作。榜發。店主子落第。郝竟獲雋。復以金倩人覆試。訖不敢入禮闈也。三科後。大挑得知縣。籤分江蘇。嘗語人曰。我向不知破題做法。孰知僅有兩句耳。皆以爲笑談。光緒丁酉。江南鄉闈。郝奉調。簾差大懼。星夜託病歸里。從此不復來。此河內竇旬膏大令爲予言。

### 瘍醫遇騙

光緒中葉。金陵有外科王立功者。閩城知名者也。設醫室于三山大街。一日晨。有人以銀餅二圓饋王。且曰。吾外甥爲綢莊舉徒。遭人姦騙。致患臀風。吾今薄暮約其來求診。先以此爲贈。第外甥畏羞。請勿於人前說破也。王允之。其人遂至綢莊。購綢緞約三百金。謂莊主曰。請遣一學徒隨我往外科王先生處付銀。市人皆知王。固無不

信老。卽遣徒挾貨物隨之行。至王室門外。其人曰。以貨與我。在此坐候。爾隨王先生上樓可也。王見其人偕一童子來。以爲必其外甥也。相喻無言。邀童子登樓。童子以爲必給銀也。孰料王謂之曰。爾有病勿害羞。請脫袴。我爲爾治之。童大怒。王曰。爾母舅先言之矣。忽諱疾也。童曰。孰爲我母舅者。其人來我肆購物。我隨來取貲耳。何病之有。王至此始悟遇騙。亟下樓視其人。已杳矣。乃訟於官。時湖南翁延年令上元。斷令王賠其半。綢莊亦認其半。而騙子終不可捕。

### 方九麻子

九麻子者。乾隆中直隸總督方勤襄公之族叔。勤襄名維甸。卽世所稱小宮保是也。九麻子名不著。少無賴。能以術攫人財。屢犯法。捕弗獲。富人畏之。貧人又甚喜之。蓋詐取之財。施與不吝也。中年勿走保定。投制府。自陳改行。願爲走卒。以自效。制府以族屬尊行。使佐內署會計事。月給數金而已。久之。勤謹逾常人。且絲毫不苟。性復謙抑。合署之人皆善之。主計者亦屢譽之。制府以爲果改行也。數倍其俸給。而勤謹謙

抑如故。更重之。方無事不出署。偶出。必購舊皮箱歸。以爲常。數年積皮箱百數十具。人問之。答曰。南方革貨甚名貴。北貨值賤而物堅。雖費舟車資。獲利猶倍蓰也。皆服其心計。忽一日。謂制府曰。我離家三年矣。將歸省老母。乞假數月。制府允之。且厚贖之。方於是雇大車十餘輛。實其箱加鎖焉。亦不知中藏何物也。先是制府尊人格敏公。出塞省親也。每歲徒步往返數千里。道必經沙河縣之伽藍寺。寺卽在大道旁。距保定百餘里。一年大風雪。凍餓僵寺門外。方丈僧夢有虎臥寺前。驚起集徒衆持械往視。則一死人也。衣履不類丐。撫之體尙溫。昇入救之甦。更爲粥糜藥餌以養之。詢知爲孝子也。更贈裘與金焉。數日病已。將行。謂僧曰。我若得富貴。必大興爾寺。俾爲通省冠。及公受特達知。不十年。官直隸總督。加太子少保。公諱觀承。世所稱老宮保是也。公乃捐萬金修寺。於是閣省官民布施無算。寺僧又善營運。有良田數千頃。跨三邑界。下院數十處。京師永興寺亦下院之一也。富果爲通省冠矣。九麻子夙知之。是日驅車出。將抵寺。日已西。謁方丈。謂受制府命。護衣笥還故里。距驛尙遠。不得達。



求假一宿。僧許之。乃積筭於僧之密室。更命沙彌備浴器。更命購皮紙數十張。麪餅一器。方以浴盆置密室中。以皮紙嚴封其窗隙。僧大異之。謂時正炎暑。何不憚煩。乃爾及入浴。僧竊窺。則見其坐浴盤中。作恨恨聲曰。皆是爾作怪。致名播全省。無立足地。隨語隨拔其髻之毫毛。僧白之方丈。方丈曰。是矣。無疑也。蓋數月前。有太盜號飛毛腿者。入京劫某邸。得贓甚巨。上命步軍統領懸重賞購之。期必獲。遍通都大邑。皆懸有賞格。事頗急。至是僧乃密報縣官。遣兵役掩捕之。方至縣。自陳如告僧語。官不信。繫方獄。遣人至保定偵虛實。信乃大恐。延方上坐。盛筵請罪。且厚賄之。屬勿爲制府知。方曰。可。但筭存僧寺三日矣。保無有遺亡者。須輦至縣署驗之。官云。然。筭至。啓之。則殘破之袈裟經典。以及木魚鐘磬之屬。再啓。三啓。亦如之。方怒曰。此必僧易之矣。豈有迢迢數千里。而賚此歸哉。且督署中。安得有是物哉。擲清單出。命寺僧如數以償。僧大驚愕。無以辨。再三請官。命罰五萬金。俾方成行焉。方歸爲富人。以終。不復爲馮婦矣。後制府知之。歎曰。其才可愛。其心不可測也。今而後不敢遽信人矣。後數

十年有插天飛事。

### 插天飛

插天飛者。名亦不傳。亦方族也。才更勝於九麻子矣。其貌方。顴廣。頰美。鬚髯。望如天神。學問。賅洽。熟諳宮廷掌故。有徒黨數十人。周流各省。專伺察地方大吏。以取財。有河南巡撫某。以事擢上。怒將罪之。未發也。忽喧傳有操北音者數十人來。賃居城外某巨寺。終日閉門禁出入。惟晨開片刻。通樵汲而已。數日來。合城文武皆皇駭。祥符縣令遣幹役終日伺之。一日薄暮。有人出似奄狀。手提壺將行。沽役尾之。至肆。與語不答。提壺返。悄悄掩門入。次日又遇之。役代給直。初不肯。繼見肆主終不受。乃向役謝。役更邀之飲。詢之。奄曰。吾主今上大阿哥也。因爾巡撫於某某等案。得賄枉法。故命密訪。如得實。聖怒不可測也。爾慎勿洩。否則我無命矣。役唯唯。亟走報。皆皇懼失色。計惟有重賄以息事耳。次日。自巡撫以下。皆具衣冠往謁。車騎喧寺外。叩門不應。但聞敲扑聲。呼號聲。久之寂然。門忽啓。有二人如校尉者。以筐舁一屍出。血肉模糊。

役見之。卽昨日沽酒之內監也。皆大懼。懍懍然報名膝行而進。插天飛則黃馬褂。珊瑚冠孔雀翎。如侍衛大臣狀。指臺坐少年謂衆官曰。爺在此。可行禮。少年欠伸小語。衆不聞。則代宣曰。明日回京也。皆唯唯。至暮。巡撫括黃金萬兩密遺之。次日黎明。衆官祖道於城外。忽擲一紙裹與巡撫。命回署啓閱。歸視之。乃以巨幅大書領謝二字。始嗒然知遇。騙道光間漕河兩督皆駐節清江浦。有山東巡撫署河督者。抵任有日矣。忽有老者衣冠謁漕督。謂是新河督之封翁。接見暢談京朝事。皆源源本本。旣而曰。我先小兒一日行計。渠亦應到矣。頃見某骨董肆有古玉數事甚佳。議價三千金。立索不欠。故來挪借。俟小兒一到卽奉還。漕督立命昇三千金出。正酬酢間。忽報新河督至。老者笑曰。渠亦應到矣。河督入見。一老翁冠服極品。傲然踞上坐。不爲禮。不知誰何。不敢問。老者撚鬚微笑曰。爾來甚善。爾等當有公事。我暫退。漕督送之出。返河督問曰。彼何人。何倨傲若是。漕督大詫曰。非公封翁耶。河督曰。家君病廢在京。幾曾出都門者。是騙也。急命捕之。已不知所往。但見綠肩輿一乘。紅傘一柄。擲河干而

已。他說部記此者微有脫誤。且不知爲方氏插天飛也。久之案累累。京外交緝。邏者遇於蘇州。偵知居專諸巷逆旅。乃會同地方官捕之。兵役數十人圍其居。將縛之。方曰。姑緩我。我罪不至死。諸君來。豈可空勞。我床下有制錢五百緡。冬裘尙十餘笥。不如請諸君分之。免爲他人得也。立命置酒徵歌舞。數十人皆醉飽。分其裘各數襲。皆披於身。又各携錢十餘緡圍腰際。挾方行。時正深秋。諸人裹重裘挾錢緡。重累汗下。幾不能步。至歧途。方乘其不備。奔而逸。諸兵役喘息不屬。不能追也。遂不知所往。論者以九麻子視插天飛。誠所謂小巫見大巫矣。具此奇才。而僅以騙術稱雄。不亦大可惜哉。

# 清代野記卷下目錄

戕官類記

刺馬詳情

妻控夫強姦

科場舞弊

書楊乃武獄

死生有命

海王邨人物

程堡殉難

勝保事類記

冤鬼索命

裕庚出身始末

清代野記 卷下 目錄

劉傳植出身始末

雁門馮先生紀畧

道學貪詐

滿員貪鄙

滿州老名士

文章挾制

肅順軼事

楊查孽緣

神經病能前知

貴女殺親夫

名士遇鬼

猴怪報怨

前世冤鬼

鬼捉酷吏

翰林不識字

妖狐爲祟

方某遇狐仙事

清代野記 卷下 目錄



# 清代野記卷下

梁溪坐觀老人編述

## 戕官類記

同治庚午。予在揚州。聞丹徒嚴某官浙江嵊縣知縣。忽爲署中雍髮匠所戕。並殺其幼女。及女之乳母。取縣印出。跳舞狂歌於市。似有神經病者。旋獲之。按律治罪。是年山東青州知府某亦被戕。青州有城守參將。一兵以技勇資格皆應拔補馬糧。忽爲人以賄得。大怒。思得參將而甘心焉。乃於朔日之夜。伏於武廟神座下。待之。以參將是日必來拈香也。及黎明。見有一三品頂戴者。跪拜神前。突出刺之。而斃。諦視。乃知府。非參將也。須臾參將至。乃執而置諸法。至庚午秋。又有張文祥刺馬新貽事。

## 刺馬詳情

馬新貽字穀山。山東荷澤人。世爲天方教。由進士分發安徽。卽用知縣。咸豐間。皖北

一帶粵捻交訐。馬以署合肥縣失守革職。帶罪立功。唐中丞委辦廬州各鄉團練。一日與捻戰而敗。被擒。擒之者即張文祥也。文祥本有反正意。優禮馬。且引其同類曹二虎石錦標與馬深相結納。四人結爲兄弟。與馬約。縱之歸。請求大府招降其衆。馬歸爲中丞言。允之。張曹石三人遂皆投誠。大府乃檄馬選降衆設山字二營。令馬統之。張曹石皆爲營哨官矣。至同治四年。喬勤愨撫皖時。馬已洊升至安徽布政。駐省城。兼營務處。抵任後。山字營遣散。張曹石皆隨之。藩司任。各得差委。甚相得也。無何曹二虎眷屬至。遂居藩署內。時張已微。窺馬意漸薄。大有不屑同羣之意。勸曹勿接眷。曹不聽。曹妻旣居署中。不能不謁見馬夫人。馬見曹妻豔之。竟誘與通。又以曹在家不能暢所欲爲。遂使曹頻出短差。皆優美。久之。醜聲四播。文祥知之以告。曹不信。繼聞人言嘖嘖。乃大怒。欲殺妻。文祥止之曰。殺姦須雙。若止殺妻。須抵償。不如因而贈之。以全交情。曹首肯。乘間言於馬。馬大怒。謂汚巖大僚。痛加申斥。曹出語張。張曰。禍不遠矣。不如遠引爲是。曹不能決。忽一日馬檄曹赴壽春鎮署。請領軍火。時壽春

鎮總兵爲徐鷗。字心泉。懷寧人也。喬勤懋大營駐壽州南關外。徐爲總營務處。曹得檄甚喜。欣然就道。文祥謂錦標曰。曹某此去。途中恐有不測。我與若須送之。蓋防其中途被刺也。於是三人同行。至壽州。無他變。石笑之。謂張多疑。張亦爽然若失。及投文鎮轅謁見。忽中軍官持令箭下。喝綁通匪賊曹二虎。曹大驚。方欲致辯。徐總兵亦戎裝出。曹大聲呼冤。徐曰。馬大人委爾動身後。即有人告爾通捻。欲以軍火接濟。捻匪已有文來。令即以軍法從事。無多言。遂引至市曹斬之。張跌足大慟。謂石曰。此仇必報。我與爾須任之。石沉吟。張又曰。爾非朋友。我一人任之可也。曹旣死。張石收其屍。藁葬訖。遂分道去。不知何往。至九年。李慶翱爲山西臬司。統水陸各軍防河。駐軍河津縣。石錦標爲李之先鋒官。已保至參將矣。一日委石稽查沿河水師各營。凡十一營。營官公讎石于河上。忽有大令至。調石回。謂有江督關文達石至兩江對案云。云蓋張文祥之難作矣。時馬新貽方督兩江。督署尙未重建。借首府署駐節。署旁有箭道。每月課將弁於此。馬被刺之日。正在閱課。甫下座。忽有一遞呈呼冤者。文祥乘

此突出刺之入馬左脅。刀未拔出。傷口亦無血。方喧嚷間。馬回首見張曰。是爾耶。復回顧左右曰。不要難爲他。遂倒地。鼻回臥室。遂死。張既刺馬。蟲立不少動。時兵衆方執呼冤者拷訊。文祥大呼曰。毋冤他人。刺馬者我也。我願已遂。我決不逃。於是司道府縣聞風皆至。藩司梅啓照命發交上元縣收禁。時首府爲孫雲錦。上元縣令張開。祁江寧令蕭某。卽於上元署中同訊。余等皆在屏後竊聽。文祥上堂。原原本本。如數家珍。兩令相對。貽聘莫敢錄。供通詳。次日商於梅啓照。梅曰。不便直叙。須令改供。浙江海盜挾仇報復。張不肯。其後種種酷刑。皆逼令改供。非無供也。張又云。自曹被殺後。我暗中隨馬數年。以精鋼製匕首二。用毒藥淬之。每夜人靜。疊牛皮四五層。以刃貫之。初不能入。二年五層牛皮一刃而洞穿矣。蓋防其冬日著重裘也。馬爲浙撫時。一曾遇於城隍山。護從甚衆。不能下手。至今乃遂志耳。梅言於護督。以海盜入告。護督者將軍魁玉也。奏入。朝命鄭敦謹爲查辦大臣。鄭未來之先。朝命漕督張之萬就近查辦。張不敢問。託故回任。乃改命鄭也。相傳張奉命後。自淮來寧。一日舟泊瓜州。

欲登岸如廁。以小隊二百持械圍護之。時人傳爲笑談。鄭至江寧。張之供仍如在上元時。一字不改。鄭無如何。乃徇衆官之請。以海盜挾仇定案。司官有顏姓者。於讞定後棄官而歸。鄭亦引疾去。其年爲同治九年庚午鄉試之年。馬死之日在七月下旬。正上下江學使者錄遺極忙時也。次日上江學使殷兆鏞考貢監場。題爲若刺裼夫。諸生譁然。相率請示如何領題。殷沈吟曰。不用領題。不用領題。又次日補考。題爲傷人乎。蓋皆謔而虐矣。馬死後數日。署中一妾自縊。並未棺斂。密埋於後園中。即曹妻也。時上海戲園編出刺馬傳全本。皖撫英翰聞之。亟函請上海道涂宗瀛出示禁止。並爲馬請祠請謚。鋪張馬之功。幾與曾胡埒。裕庚手筆也。英與馬同官安徽。有休戚相關之誼云。厥後喬勤慤有七律詠其事。末二句云。羣公章奏分明在。不及歌場獨寫真。案既定。決張文祥於金陵之小營。馬四親自監斬。馬四者新貽之弟。浙江候補知縣也。定製一刀一鉤。命劊子以鉤鉤肉而碎割之。自辰至未始割畢。剖腹挖心而致祭焉。文祥始終未一呼號也。子一閹割發黑龍江爲奴。石鋪標亦革職遣戍。案既

結馬四後至浙江爲衆指摘上官亦不禮之鬱鬱死新貽既葬數年河決荷澤墓爲水所冲塌無子天之報施固不爽耶。

### 妻控夫強姦

潘文勤公長刑部時有婦人訴其夫強姦者文勤曰是必有姦夫教之欲以法死其夫也蓋清律載夫與婦爲非法交者兩相情願以和姦論若婦不肯而夫用強則照強姦論然有律而無案誠以閨闈之中事屬曖昧孰知之而孰發之哉故文勤一見即知有唆使之入嚴鞠果然遂並唆者而治罪焉此吳江范瑞軒比部爲予言潘文勤門生也因憶道光中葉桐城方寶慶掌刑部秋審處有告室女與表弟通姦者驗之處女也然形迹實可疑堂上將釋之矣方命承審官曰可驗其後庭驗之非完璧乃以非法淫定姦夫罪而判女折贖罰鍰合署稱神明焉女歸自縊死男聞亦自盡于獄蓋此女極愛其表弟而幼已字人表弟亦訂婚不得諧婚媾遂于無可聯合中而相愛焉又不忍以破甌貽夫羞此亦可謂發乎情止乎禮義矣若我爲刑官即

明知而故昧可也。何必逞此精明而傷人命哉。方後授福建漳州知府。以墨敗。三子皆流落以死。無後。妻於咸豐季年亦餓死。人以爲谿刻之報。光稷甫侍御云。

### 科場舞弊

咸豐戊午科順天鄉試大獄。伏法者正攷官大學士柏後。同考溥安。士子平齡等。又場外傳遞之程某。而遣戍革職者不知凡幾。原參御史孟傳金。初固不料如是之嚴懲也。蓋自道光以來。凡士子來京應試。遇同鄉京官之攷差者。必向之索關節。謂之條子。不必一定爲利。亦有爲收門生計者。亦有博延攬人才名者。若不向之索條子。則其人必見怪。以爲此士瞧不起我。因而存芥蒂者有之。故熱中之士。亦樂得乞條子也。此風已久。昌言無忌。恬不爲怪。及戊午事起。而此風遂絕。事後執政諸大老。皆覺殺人太多。追咎孟御史多事。遂摭他事發回原衙門。自是科場嚴肅者十年。己未會試。奉特旨加倍嚴搜。片紙隻字皆不敢挾入。光稷甫侍御即此科中式者。爲予言。至同治改元。慈禧秉政。博寬大之名。凡派搜檢之王大臣。請訓時。必諭之曰。勤慎當

差莫要多事。即隱示以勿搜也。而士子之懷挾。直可設一絕大書肆矣。至同治庚午科。江寧有劉汝霖者。時文高手也。爲人代作而中。嗣是每科富貴子弟皆劉之生計矣。劉成進士始已。繼起者爲陳光宇。爲周鉞。皆江寧槍手之卓卓者。所代中不知凡幾。陳入翰林後。竟因此永不准攷差。周後亦分發河南知府。繼陳周而起者無數矣。直至停科舉之日。止。蓋江南一闈。行賄于考官者。尙無其人。惟代作者。實繁有徒。北闈自光緒改元後。此風亦盛。初猶鄉試爲之。繼乃會試亦公然爲之。戊戌會試。有寶應劉某者。以一人而中三進士。且得一會元。執政知之。廷試時會元與劉皆抑至三甲。會元用中書。劉用主事。二人書法皆佳。皆可得翰林者也。當道不敢興大獄。聊示薄懲而已。至湖南主考楊泰亨。陝西主考周錫恩。浙江主考費念慈。大張旗鼓。出賣舉人。更卑卑不足道矣。此科場氣運之所以終。而國之所以亡也。

### 書楊乃武獄

浙之上虞縣有土娼葛畢氏者。葛品蓮之妻也。豔名噪一時。縣令劉某之子暱焉。邑



諸生楊乃武亦暈焉。楊固虎而冠者。邑人皆畏之。劉之子更嫉之。楊欲娶葛爲妾。葛曰。俟爾今科中式則從爾。榜發。楊果雋。謂葛曰。今可如願矣。葛曰。前言戲之耳。吾有夫在。不能自主也。楊曰。是何傷。正言間。劉子至。聞楊語。返身去。楊聞有人來。亦去。次日而葛夫中毒死矣。報官請驗。縣令遣典史携仵作往。草草驗訖。聞楊有納妾語。即逮楊。訊不承。令怒。詳革舉人。刑訊終不服。遂繫楊葛于獄。延至四年之久。每更一官。楊必具辯狀。皆不直。楊然又無左證。而劉令子又死福星輪船之難。浙之大吏將以楊定讞抵罪。而坐葛以謀死親夫矣。會有某國公使在總署。宣言貴國刑獄。不過如楊乃武案含糊了結耳。恭親王聞之。立命提全案至京。發刑部嚴訊。原審之劉令。葛品蓮之屍棺。皆提至京。及開棺檢驗。見屍有白鬚。且以絲棉包裹。兩手指指甲皆修潔。既不類窶人子。又非少年。又無毒斃痕迹。訊劉。劉亦無從置對。蓋始終未見屍也。于是劉遣戍。楊葛皆釋放。案遂結。此案到京之日。刑部署中觀者如堵。牆幾無插足地。陸確齋比部。江西司司員也。亦往觀。據云。葛氏肥白。頗有風致。云。葛出後。削髮爲尼。

楊則不知所之。或云當劉子聞楊語時。卽潛以毒置葛品蓮茶甌中。品蓮飲之致死。或又曰劉子常携毒備覬便毒楊者。未知孰是。要之劉子之死于海。似有天道。楊雖非佳士。此案似非所爲。又聞楊每於供詞畫押時。以屈打成招四字編爲花押書之。吾以爲楊必有隱慝。冥冥中特借此以懲之耳。

### 死生有命

光緒元年。上海招商局以福星輪船載海運糧米赴津。附舟者江浙海運委員三十餘人。又搭客數十人。行至黑水洋。遇大霧。適迎面一船來。未及避。被撞而沉。時當半夜。全船之人皆已寢。遂及於難。委員中有一滿人者。將自蘇起程時。夢有人持一文牘示之。大書水府二字于牘面。云有公事相邀會議。醒即言於人。以爲不祥。將改由陸行。聞者嗤之。其人亦以爲夢境無足憑。遂至滬附福星而死。此滿人予尙至其家爲人致賻金焉。今忘其名矣。中國鬼神之說甚不可解。又有一林姓者。亦海運委員也。動身之日。已瀟暮矣。一犬橫臥于大門外。林未之見。誤躡犬身。傾跌傷足。不能行。

改期焉。竟免于難。莫謂此中無天道焉。

### 海王邨人物

今京師之琉璃廠。乃前明官窰製琉璃瓦之地。基址尙存。在元爲海王邨。清初尙不繁盛。至乾隆間始成市肆。凡骨董書籍字畫碑帖南紙各肆。皆齎集于是。幾無他物焉。上至公卿。下至士子。莫不以此地爲雅遊。而消遣歲月。加以每逢鄉會試放榜之前一日。又於此賣紅錄。應試者欲先覩爲快。倍形擁擠。至每年正月初六起至十六日止。謂之開廠旬。合九城之地攤。皆聚于廠之隙地。而東頭之火神廟。則珍寶書畫骨董陳列如山阜。王公貴人命婦嬌娃車馬闐塞無插足地。十日乃止。此廠肆主人所以皆工應對。講酬酢。甚者讀書考據。以便與名人往還者。不知凡幾。不似外省肆傭之語言無味。面目可憎也。予出入京師幾三十年。廠肆之人。幾無不識予者。以予所知有數人焉。有若琴師張春圃者。其志節高尚。已紀于前矣。有若劉振卿者。山西太平縣人。傭於德寶齋骨董肆。晝則應酬交易。夜則手一編專攻金石之學。嘗著化

度寺碑圖考。洋洋數千言。幾使翁北平無從置喙。皆信而有徵。非武斷也。德寶主人李誠甫。亦山西太平人。肆始於咸豐季年。僅千金資本耳。李乃受友人之託而設者。其規矩之嚴肅。出納之不苟。三十年如一日。今則其肆已逾十萬金矣。誠甫能鑒別古彝器甚精。潘文勤王文敏所著大半皆出其手。誠甫卒。其猶子德宣繼之。亦如誠甫在日。猶蒸蒸日上也。有若李雲從者。直隸故城人。幼習碑賈。長益肆力於考據。當光緒初年。各衙門派員恭送玉牒至盛京。盛伯兮侍郎。王蓮生祭酒。端甸齋尙書。皆在其中。一日夜宿某站。盛與王縱談碑版。端詢之。王奮然曰。爾但知挾優飲酒耳。何足語此。端拍案曰。三年後再見。及歸。遂訪廠肆之精于碑版者。得李雲從。朝夕討論。購宋明拓本無數。又購碑碣亦無數。其第一次所購。卽郭休碑也。以五百金得之。羅列滿庫院。果不三年而遂負精鑒之名矣。雲從爲潘文勤所賞識。有所售輒如數以償。故雲從得以揮霍十餘年。終以貧死。至書肆主人。於目錄之學。尤終身習之者也。光緒初。寶森堂之李雨亭。善成堂之饒某。其後又有李蘭甫。談篤生諸人。言及各朝

書板書式箸者刻者。歷歷如數家珍。士大夫萬不能及焉。又有袁回子者。江寧人。亦精於鑒別碑帖。某拓本多字。某拓本少字。背誦如流。有若古泉劉者。父子皆以售古泉爲業。其考據泉之種類。有出乎各家箸錄之外者。惜文理不通。不能箸述。爲可恨耳。至博古齋主人祝某。鑒賞爲咸同間第一人。皆推重之。炳半聾時爲予言。予生也晚。不及見此人矣。及新學盛行。廠肆多雜售石印鉛板諸書。科學儀器之屬。而好古之士。日見寥寥。此種商業。與此種人物。皆將成廣陵散矣。世運升降盛衰之故。不其然哉。不其然哉。予深惜闌闌中有如是之人。而無人傳之也。因拉雜書之。

### 程堡殉難

丹徒吳封翁啓。軍機章京台朗。監察御史台壽之父也。咸豐戊己間。由京携家僑居蘇州。翁時年七十餘。形貌魁梧。白鬚渥丹。性復伉爽。能飲健談。座客常滿。日者有客自京來。翁觴之。客程姓。名堡。字鎮伯。先世亦丹徒人。惟堡官京師已三世矣。時以京曹截取道員發浙江。道出蘇州。年五十餘。無子女。僅携老妻與一僕而已。居翁家數

日終日求寶刀名馬。翁笑之。程曰。今粵寇未靖。浙與賊鄰。豈必無戰事。吾今往當請纓自效。與長槍大戟相周旋。不願以毛錐子露頭角也。迨至浙。未三月。賊襲杭陷之。會提督張玉良援師至。即克復。前後僅三日也。而堡死矣。先是賊之來也。爲徽寧之敗。賊僅三千餘人。堡所居去賊尙遠。聞賊入。大怒。髮衝冠。髯奮張。揮刀出門。擊殺數十百人。賊鬻集交刃之。遂殞。妻亦自縊。其僕於賊去後。殮其夫婦。而至蘇。述其狀於翁。翁大哭。設位祭之。且歸葬其櫬于祖籍焉。嗟乎。堡一候補官耳。無守土之責。何必死。即不出殺賊。亦無人責以不義者。更何必死。而堡也。則深以未酬其志。必欲殺賊以死。死忠義也。杭城旣復。未聞當事有褒卹之者。是豈遺忘之耶。抑以死之無名。而不措意耶。予嘗聞先君子言之甚詳。故特表而出之。

### 勝保事類記

勝保字克齋。滿州廂藍旗人。以乙榜任國子監助教。轉翰林。開坊浚。至侍郎。尙書銜。太子少保而終。其居官事蹟。載在國史。不必記。記其由皖豫入陝瑣事。皆聞之。先

君子者。先君子以咸豐十一年冬入勝保潁州戎幕。相從至河南至陝西。至同治二年春逮問而止。前後十六月中。所見甚夥。頗足記也。豫有邢家寨者。附捻逆者也。寨主邢萬鈞。曾擄勝保弟恩保而污辱之。至是恩保爲翼長。潁州圍解。乘勝攻克邢家寨。捕邢萬鈞。並捕其妻妾子女。恩保令兵士於白晝污而斬之。又製一刀。銘曰斬邢萬鈞之刀。用以礮之而洩忿焉。及勝獲罪。恩亦遣戍黑龍江。久之無以爲生。遂入馬賊黨。爲將軍銘安捕斬之。有張龍者。宿州人。亦擒首也。其妻曰劉三姑娘。美而勇。嘗披紅錦袍。插雙雉尾。乘駿馬。舞雙刀。人莫敢敵。張龍有外寵。劉銜之次骨。勝知之。使人誘劉以爲義女。劉感勝。遂刺殺龍以衆降。勝又慮人之言多也。以劉配部將某。勝敗。劉復暗結苗沛霖圖舉事。爲蒙城知縣尹春霖所殺。並其夫斬之。苗沛霖者。鳳陽諸生。性陰鷲。悍。有兵略。以團練保衛功。洊至布政使銜。四川北道。巴圖魯。又暗通粵寇洪秀全。封爲秦王。夜郎自大。目無餘子。獨服膺勝保。執弟子禮甚恭。僞英王陳玉成自安慶爲曾忠襄所敗。全軍皆沒。窮無所歸。走鳳陽投苗。苗匿而不見。使

其姪天慶縛獻于勝。時勝駐軍于河陝之交。得陳大喜。尅日親訊。盛設軍衛。陳立而不跪。大笑曰。爾乃我手中敗將。尙靦然高坐以訊我乎。因歷舉與勝交綏事。勝大慙。命囚之。鋪張入奏。冀行獻俘大典。以矜其功。批答反斥其妄。並命就地正法。大失所望。遂切齒于曾氏矣。陳之囚也。有精舍三椽。陳設皆備。環以木柵。兵守之。先君子與馮魯川裕朗西皆往見。貌極秀美。長不逾中人。二目下皆有黑點。此四眼狗之稱所由來也。吐屬極風雅。熟讀歷代兵史。侃侃而談。旁若無人。裕舉賊中悍將。以繩之。則曰。皆非將才。惟馮雲山石達開差可耳。我死。我朝不振矣。無一語及私。迨伏誅。所上供詞。皆裕手筆。非真也。陳妻絕美。勝納之。寵專房。隨軍次焉。勝性豪侈。聲色狗馬。皆酷嗜。生平慕年羹堯之爲人。故收局亦如之。勝每食必方丈。每肴必二器。食之甘。則曰。以此賜文案某。蓋仿上方賜食之體也。然惟文案得與。他不得焉。一日者。先君子報謁某于他所。忽奉勝召。遂亟歸。勝曰。大帥之文案。猶皇上之軍機。至尊貴至機密。不得與他員相往來者。爾何報謁之有。勝豪于飲。每食必傳文案一人侍。晏初。



先君子與馮裕皆常侍晏者。繼以先君子不能飲。遂命馮裕以爲常。一日軍次同州境。忽謂文案諸員曰。今午食非黃甚佳。晚飧時與諸君共嘗之。及就坐。詢非黃。則棄其餘於臨潼矣。大怒。立斬庖人於席前。期明早必得。儲庖人大駭。飛馬往回二百餘里。取以進。其泰侈如此。馮魯川山西進士。由刑部郎簡放廬州知府。出京赴任。道由河南。勝奏留軍中司章奏。馮端人也。高尙澹泊。不趨時習。一日與勝言論。不翁決然捨去。恐面辭不得。留書別之。勝閱書大驚。亟命材官賚狐裘一襲。白金二百。飛騎追馮還。戒之曰。如馮不歸。殺爾無赦。並手書致馮。略曰。計此書達左右時。公度韓侯嶺矣。此即雪擁藍關馬不前。昔退之咨嗟太息之地也。公於軍事雖非所長。然品望學問。當代所重。所以拳拳於公者。以公之品學。足以表率羣倫也。云云。馮得書。即返。勝大慰。先君子私詢於馮曰。公何以去而復返。馮曰。勝雖跋扈恣睢。然能重斯文。言亦出於至誠。可感也。勝之章奏。往往自屬草。動輒曰。先皇帝曾獎臣以忠勇性成。赤心報國。蓋指咸豐間與英人戰八里橋事也。又曰。古語有云。闔以外將軍治之。

非朝廷所能遙制。又曰漢周亞夫壁細柳時。軍中但聞將軍令。不聞天子詔。此三語。時時用之。意以爲太后婦人同治幼穉。恐其牽掣耳。而不知致死之由。即伏於此矣。至西安日。入行臺。甫下輿。而冠上珊瑚珠忽不見。遍覓不得。識者已知爲不祥矣。及事敗年餘。有人於地肆上。以錢四百購得之。可詫也。入陝後。各省督撫交章劾勝。有劾其貪財好色者。有劾其按兵不動者。有劾其軍中降衆雜出。漫無紀律者。惟河南巡撫嚴樹森一疏最刻毒。略曰。回捻癰疥之患。粵寇亦不過支體之患。惟勝保爲腹心大患。觀其平日奏章。不臣之心已可概見。至其冒功侵餉。漁色害民。猶其餘事云云。相傳爲桐城方宗誠手筆。是以慈禧震怒。立下逮問之旨。而獄成矣。初勝之至陝也。軍機處有密書至。屬其日內切勿上言觸怒。因廷議將以陝撫甘督二者擇一簡任。俾專力於西北軍事。勝得書示文案諸員曰。姑妄聽之。逾數日無耗。又曰。是或有變。不得不上言利害以要之。衆勸稍緩不聽。乃自屬稿。略曰。凡治軍非本省大吏則呼應不靈。卽如官文胡林翼曾國藩左宗棠等。皆以本省大吏治本省兵事。故事半

而功倍。臣以客官辦西北軍務。協餉仰給於各省。又不能按數以濟。兵力不敷。又無從召募。以致事事竭蹶。難奏厥功。若欲使臣專顧西北。則非得一實缺封疆。不足集事。奏上大受申飭。至謂該大臣跋扈情形。已可概見。不匝月而逮問矣。勝之爲欽差大臣也。與河陝兩省巡撫。皆朱筆札文。文案諸員嘗諫之。勝曰爾輩何知。欽差大臣者。卽昔之大將軍也。大將軍與督撫例用札。不以品級論也。在陝日。有駐防副都統高福者。出言頂撞。勝大怒呼杖。高福曰。等二品耳。何得杖我。勝曰。我欽差大臣也。以軍法且可斬。何止杖。立命杖二百。逐之出。後之効疏。高福亦其一也。又有德棱額者。初幫辦陝西軍務。亦副都統也。勝至劾去。降參領。俾統一軍壁黃河岸。德亦銜之。逮問之旨。密交多隆阿自賚。卽代勝爲欽差大臣者。至之日。勝方置酒高會。賓客滿座。有諜者報曰。灤橋南忽增營壘三十餘座。不知誰何。蓋橋之北爲回逆所據也。須臾又報曰。來者聞爲將軍多隆阿也。勝綽髯沉吟曰。豈朝廷命多來受節制乎。若然則不待營壘成。卽當入城進謁矣。姑飲酒。且聽之。有登城望見者。而連營十餘里。刁斗

森嚴燈火相屬。寂無人聲。歸而相謂曰。事不妙矣。有潛行整裝待發者。甫黎明。忽報多將軍至。將軍下馬。昂然入中門。手舉黃封。高呼曰。勝保接旨。勝失色。卽設香案。跪聽宣讀。讀畢。並問曰。勝保遵旨否。勝對曰。遵旨。多卽命取關防。至驗畢。交一弁捧之。謂從官曰。奉旨查抄。除文武僚屬外。皆發封記簿。勝再三懇多曰。與爾八駝行李。其餘皆簿錄之。當卽摘去珊瑚頂孔雀翎。易素服待罪。遣兵百人守之。凡文武員弁兵卒役夫。皆遵旨投多軍矣。所不去者。幕中四人耳。一先君子。一馮魯川。一裕郎。西一丁友笙也。魯川尙作諧語曰。諸君不觀降者乎。明日皆將倣我矣。勝於此驕容盡歛。淒然無色。平日庖人四十八人。僅存其二。紅旗小隊二百。並旗械皆不見。材官之便捷者皆亡去。所存者老僕三人。圍人二。皆勝官翰林時舊役也。是晚卽聞礮聲。隆隆徹夜不息。次日黎明。人報瀾橋克復。回壘皆掃平矣。卽勝四十餘日。所不能攻克者也。逾數日。文案舊員楊某。頭銜一新。欣欣然謂先君子曰。克復瀾橋保案。已得知府銜直隸州矣。公等不入多軍。真愚也。一笑置之。不數日。勝就道。例以鐵索纏輿。

橫示鎖拏意。甫至河。德楞額截其輜重侍妾而去。勝訴於多。始返其輜重。而留其侍妾。謂人曰。此陳玉成賊婦也。不得隨行。勝亦無如何。四人者。送至山西蒲州府。灑淚而別。勝猶人贈百金爲舟車資也。於是四人遂分道矣。馮魯川往安徽赴任。裕朗西往江北寶應省親。丁友笙往河南。先君子由清江至泰州。攜予返上海。魯川名志沂。山西代州人。朗西名庚。漢軍正白旗人。原姓徐。父聯翰。庭曾爲江蘇縣令。友笙名憲。錚。懷寧人。後不知所終。勝至京。繫刑部獄。奉旨嚴訊。猶桀驁不馴。訊其河南姦淫案。答曰。有之。河內李棠階。商城周祖培。兩家婦人。無老幼。皆淫之。周大怒。其後賜帛之命。皆周成之也。是時周值樞府。李掌刑部。死之日。周監刑。勝曰。勝保臨刑呼冤。乞代奏。周曰。聖意難回。遂死之。勝有印章二。一曰我戰則克。一曰十五入泮宮。二十入詞林。三十爲大將。皆生平得意事也。當庚申年。文宗北狩。洋兵入京。和議成。議建總理衙門以治外交事。大晏各國洋使於禮部堂上。英使巴夏理首座。酒酣。勝笑謂巴曰。今日和議已成。誓約已定。然兩軍究未分勝負也。今將與君會獵於郊外。勝負無

與國事第請與君之士戲耳。可乎。巴大恐，乞恭親王和解之。勝大笑曰：彼懼我矣。蓋是時勝奉命總統各省援兵，位諸將帥上。當時援師至者十三萬，故巴恐也。八里橋之戰，勝一生最得意事也。時洋兵麇集，僧忠親王戰不利，大沽失守，近逼北塘。八里橋者，距北通州八里。洋兵欺我無人，長驅而入。至橋，勝扼之，礮彈破馬腹，領受微傷。易馬與戰，卒敗洋兵。厥後和議易成，未受大累。未始非勝一戰之力也。當時勝裹創入見，故文宗獎之曰：忠勇性成，赤心報國，豈知此二語。即長其傲速其死哉。當洋兵之焚圓明園也，珠玉珍寶皆掠去，獨書畫古玩棄而不顧。有土寇二百餘，掠所餘而遁。至中途遇勝，聚而殲旃，盡得其所。薄錄京宅時，並其第皆賜兆公焉。兆公者，慈禧姊子。於穆宗爲中表行也。同治季年，兆公之母死，居喪不哀，慈禧大怒，命盡室所有爲皇老老焚之。皇老老者，即其姊之俗稱也。焚三日夜始竟。焚之時，命護軍統領率千人監視之。於是勝所得與歷年御賜物皆蕩然矣。聞勝所得者，有項墨林進呈之物數百種。他稱是亦書畫之浩劫哉。此事炳半龔見之，爲予言。勝一子海某，爲藍

翎侍衛。以事遭斥。同治壬癸間。飄泊至皖。英果敏憐之。爲集貲納同知。分安徽。英去亦不知所終。予隨侍。先君子在皖南時。有揚州人馮繼昌者。曾在勝軍爲文案小吏。後爲皖北牧令。謂一日奉使至宿州。見旅舍有執泛掃役者。貌酷類勝。面亦半青色。密訪之。知其母少時曾一度侍勝寢。蓋過境時。地方官所進之土妓也。而貴種淪爲下賤矣。故世之疵勝者。皆謂勝有應得之罪。惟曾文正有言。勝克齋有克復保衛之功。無失地喪師之過。雖有私罪而無死罪。人皆服其公允云。攷勝所部。惟雷正綰一軍二千人爲官兵。其餘則苗沛霖萬人。宋景詩八百人。長鎗會也。又山東大刀會千人。合之不滿萬五千人。苗軍之餉。沛霖自稱報效者。雷軍則就餉于陝者。其餘則或有或無。不能按時按數也。即如先君子在戎幕時。文牘所載皆號稱月二百金。實則月僅得六七十金耳。蓋各路協餉皆積欠。間有來者。必先儘勝揮霍。揮霍所餘。乃歸軍用耳。一日者方至同州。雷軍後至。猝遇賊伏。未及備。遂大敗。死傷枕籍。雷正綰痛哭入。求發卹賞。勝無以應。須臾負傷者累累昇至轅門下。徹夜呻吟。無過而問。

者。先君子謂人曰。實令人慘不忍觀也。嗚乎。勝治軍如此。自奉又如此。焉得不敗。就逮之次日。苗沛霖率所部返皖北而叛。宋景詩驟馬挺槍而來。哭拜于勝前曰。沐恩不能終事公矣。世事尚有公道哉。擲冠帶于階下。率八百人呼嘯而去。一渡河卽大掠。後爲宋慶所滅。大刀會亦返山東作亂。故曾國荃劾勝疏云。勝保軍營降衆雜出。誠哉是言。未之誣也。予嘗論勝之爲人。瑕瑜互見。然瑕多而瑜少。是殆不學無術之故哉。然固一世之雄也。

### 冤鬼索命

苗沛霖之叛歸皖北也。皖豫之交響應者。大小一千六百餘寨。其中勝兵者不下四十萬人。有勸苗勾結張宗儒任柱等大股捻逆直撲京津者。而苗逆必欲得蒙城爲根據地。圍攻月餘不下。蓋縣令尹某深得民心。竭力守禦也。會僧忠親王援師至。內外夾擊。苗大敗潰。沛霖乘肩輿夜遁。有步卒二尾之曠野。殺苗割其首。將以獻王。至中途遇王萬青率兵巡緝。至驗其首信。遂受其降。匿二卒于營。至夜殺之。而以苗級



赴王師報功。王大喜。立賞萬金。翌日即專摺奏保提督黃馬褂輕車都尉世職。萬青家清淮。既思富且貴矣。不可不誇耀鄉里。遂乞假以巨舟載金而歸。將至家。忽瞪目變色。趨至鷓首。若與人撐拒狀。大呼曰。莫捉莫捉。我即去。我不合殺爾。冒爾功。我知罪矣。言畢噴血而死。其從者知其事。言於人。謂實二卒索命也。異哉。豈中國真有鬼神哉。豈鬼真能爲厲哉。西醫曰。肝經熱血妄行。則生平惡迹皆現象。是說也。然乎否乎。然予必主爲厲之說。可以警世人之爲惡者。

### 裕庚出身始末

裕庚字朗西。本姓徐。爲漢軍正白旗人。父聯某。字翰庭。道咸間任江蘇縣令。君子人也。庚貌岐嶷。幼而聰穎。讀書十行並下。過目成誦。有譽庚於其父者。聯曰。是兒聰穎自恃。不受範圍。愈貴顯。愈不能保令名。吾料其必墮家聲。非福也。太息而罷。庚年十二。即入國子監肄業。時勝保爲滿助教。亟愛之。遂由官學生入泮。十四食餼。十六選優貢。累應鄉舉不第。遂就職州同。從勝保軍。甫逾弱冠耳。下筆千言。倚馬可待。縱橫

跌宕有奇氣。凡奏報軍事。極鋪張揚厲之致。令閱者動目。故所至倒屣。勝敗後。裕回江。北。省。親。旋。丁。父。艱。會。馮。魯。川。已。由。廬。州。知。府。權。廬。鳳。道。隨。巡。撫。喬。勤。愨。駐。壽。州。馮。與。喬。同。年。同。鄉。又。京。師。舊。好。言。聽。計。從。裕。得。馮。汲。引。入。喬。戎。幕。司。章。奏。喬。甚。倚。重。之。同。治。五。年。喬。調。撫。陝。西。裕。亦。相。從。已。洊。升。知。府。矣。喬。乞。休。英。果。敏。撫。皖。又。入。英。幕。而。權。勢。愈。盛。甲。戌。歲。杪。果。敏。擢。廣。督。裕。以。道。員。留。廣。東。事。無。大。小。一。決。于。裕。英。惟。畫。諾。而。已。粵。有。二。督。之。稱。其。信。任。如。此。闡。姓。捐。事。起。英。入。奏。謂。歲。可。益。百。萬。不。待。命。下。即。布。告。舉。行。巡。撫。張。兆。棟。將。軍。長。善。都。統。果。勒。敏。交。章。劾。之。英。裕。皆。革。職。未。半。年。也。英。舉。家。返。京。裕。亦。隨。之。光。緒。三。年。起。英。爲。烏。魯。木。齊。都。統。期。年。卒。于。任。裕。侘。僚。無。聊。有。言。于。李。文。忠。者。謂。裕。才。可。用。遂。至。津。文。忠。衆。人。遇。之。適。劉。銘。傳。授。臺。灣。巡。撫。延。裕。往。得。開。復。知。府。發。湖。北。時。鄂。督。爲。張。文。襄。一。見。驚。爲。奇。才。歷。畀。沙。市。漢。口。釐。稅。事。皆。鄂。省。美。任。也。復。得。道。員。以。明。保。送。部。轉。內。閣。侍。讀。學。士。奉。使。法。國。六。年。歸。升。三。品。卿。而。雙。目。瞽。矣。以。至。于。死。裕。妻。前。死。遺。一。子。曰。奎。齡。妻。婢。鳳。兒。者。赤。脚。婢。也。裕。悅。之。寵。專。

房繼又納京師妓。不容于鳳兒。服毒死。及罷官入都。邂逅一洋妓。實洋父華母所生也。洋妓者。家上海。有所歡入京。追蹤覓之不得。乃遇裕。納之。鳳兒不忿。而洋妓陰狠。能以術使裕絕鳳兒。且凌虐之。鳳兒不堪其虐。亦自經。於是洋妓以爲莫予毒也。已與裕約。不得再納妾。不得再有外遇。氣日張。權日重。玩裕於股掌之上。而服從終身焉。久之立爲繼室。逼奎齡夫婦母之。奎齡不從。逃之蕪湖。匿縣令鄒雋之署中。雋之卽清末外務部尙書鄒嘉來之父也。無何病死。鄒爲之殮。奎齡妻爲覺羅續慶女。締姻時。續方爲潁州守。續無子。僅一女。甚鍾愛。嫁後。續夫婦相繼亡。及奎齡逃。洋妓遂褫其婦之衣飾。斥爲褻婢。婦不從。鞭之。裕偶緩頰。則誣以新臺之恥。久之。裕亦與之俱化。而朝夕鞭撻矣。裕之鄰爲英教士居。常聞呼號之慘。得其情。甚怒。將與理論。始稍稍斂其鋒。然續女亦傷重死矣。當洋妓之奔裕也。携一子。小字羊哥。卽上海所歡之種也。繼又爲裕生一子二女。裕更視爲天上人矣。洋妓固有才。凡英法語言文字。及外國音樂技藝皆能之。二女旣長。亦工語言文字之學。嘗夤緣入宮爲通譯。西國

命婦之觀慈禧者。皆二女爲傳言。以故勢傾中外。會有外國女畫師者。慈禧命其繪油像甚肖。將酬以資。畫師以其爲太后也。不索直。而二女竟中飽八萬金。未幾爲禧慈所聞。逐之出宮。乃之津之滬。廣交遊。開跳舞會。泰西之巨商皆與往來。二子名勛齡馨齡。勛齡即羊哥。皆入資爲道員。馨分湖北。勛分江南。皆爲端忠敏所擯。不知所往。及裕庚死。洋妓率其二女流寓上海。有年。今不知所終。或曰隨洋人至歐洲矣。語云。知子莫若父。觀裕庚之結局。而聯翰庭之言驗矣。

劉傳楨出身始末

皖撫喬勤愨公駐軍壽州時。上元宗湘文守太源。瀚薦一人來曰劉傳楨。宗之未仕浙也。曾從事江北糧臺。勤愨時爲兩淮運使。筦糧臺事。駐泰州。倚宗爲左右手。劉之來。卽委內署文案。劉不能文。不稱職。以宗薦故耳。劉時年二十餘。美丰儀。衣帕蘊藉。風流自賞。馮魯川嘲之云。顧影翩翩劉太守。卽指傳楨也。劉雖年少。已知府用直隸州矣。旣入幕。見裕庚爲喬所重。深相結納。師事之。率妻子與裕同居。裕亦不吝教誨。

年餘。居然能爲公牘文字。卽書法亦酷似。其小有才如此。繼知先君子與馮魯川皆裕舊侶。亦過從甚密。厚貌深情。人皆不以爲忤。攷其官之由來。則得之豫勝營。豫勝營者。李世忠歸誠後所統之軍。皆降衆也。劉入營後。不一年。由白丁而至四品官。孔雀翎。或曰李艷其貌。將以官爲餌。而龍陽之劉微窺其意不善。遂托故而逃。投勤慤也。迨勤慤入陝。繼之者爲英果敏。劉大見信用。筭捐輸釐金諸要職。亦三品銜記名道矣。同治庚辛間。揚州捐輸分局。亦劉所轄也。故時來揚。藉稽核公事爲名。爲冶遊計。一日者遇李世忠于青樓。劉莊容對之。李笑曰。爾勿作態。爾忘在營時。爲我提虎子邪。劉大恨次骨。從此不敢與李相見。在揚州。以八百金購一小家女。年華碧玉。楚楚動人。畏人多言。不敢以捐局爲金屋。携至礮艇中。設陽臺焉。於是鬢影衣香。掩映于長檣大戟間矣。劉時駐蕪湖。筭皖南釐政。歲必數遊揚州。以爲常。無何。英果敏丁外艱。滿大員例持服百日。卽視事。惟果敏父沒于京。須奔喪回旗守制。遂陳請半歲假。當是時。議所以護撫印者。故事。惟布政合格。時布政爲張兆棟。按察爲裕祿。兆

棟孤介。不與諸人洽。而裕祿則與劉傳楨裕庚皆結爲兄弟。情好甚密。劉乃與裕庚謀。慫恿果敏奏請裕祿護撫印。既舍布政而取按察。則疏中於張不能無微詞。兆棟深銜之。粵東惡感。蓋根於此矣。假滿英回皖。張亦擢廣撫去。裕祿則坐升布政。同治甲戌冬。果敏擢粵督。裕祿又坐升皖撫。傳楨裕庚皆爲果敏所奏調。裕庚隨果敏先行。傳楨有未了事。約後期。不意次年五月。因擅開闢姓捐。英裕皆劾革矣。於是傳楨仍留皖。信用如故。繼而權安廬鳳穎等道。駸駸乎將膺簡命而大用焉。數年。裕祿擢鄂督。傳楨自以爲皖中老吏。新撫必倚重。忽爲御史所糾。奉旨命江督查辦。勘云。劉傳楨有奔走肆應之才。無監守臨民之器。降通判。賦閑年餘。夤緣李文忠。得筭淮軍支應。駐金陵。於是舊院笙歌。秦淮風月。朝朝暮暮。老死於是間焉。李世忠之罷官閑居也。以演劇博筌爲樂。蓄優伶數十人。往來於長江商埠。博纏頭資。又於安慶居宅設博局爲囊家。賭甚豪。勝負常巨萬。貴遊子弟趨之若鶩。有吳通判弟某者。與博徒齟齬。爲衆毆辱。傷其臂。數日死。吳固不敢與李敵。又不甘隱忍。姑控於巡撫。取進止。

裕祿受其詞。意不決。傳植進曰。李世忠怙惡不悛。屢奉嚴懲之旨。猶不知歛迹。今又以賭博釀人命。當據實上陳。勿迴護。裕卽命傳植屬草奏。上奉旨就地正法。以除後患。遂斬世忠於中軍參將署前。劉之疏稿。蓋引用曾文正受降時語。有云該逆雖已投誠。其心叵測。嗣後各督撫當隨時察看。如果有不安分之處。一面奏聞。一面即行正法。李之死。卽死此數語也。不然。以優柔無識之裕祿。安敢死李世忠哉。非劉之銜很。又誰憶二十年前之曾疏而引之哉。謂李之死死於劉也可。死於文正也亦可。李世忠初名兆壽。亦賊中僞王也。投誠後改今名。劉傳植字文枏。江南上元人。家世微賤。至傳植始以斜封貴。子二。長名家怡。捐納湖北知州。爲瑞澂劾罷。次某。夤緣入泮。發放時。以衣冠不整爲學使者戒飭。傳植死。家居蘇州。今式微矣。二十年優孟衣冠。居然富貴。槐柯一夢。不堪回首當年。吾猶爲傳植幸也。傳植有母弟曰傳林。幼失教。長傲飾非。好矚羣小。僞爲神經病。以抵觸正人。傳植有客曰姚伯平者。桐城惜抱翁後也。好作諧語。傳林妻醜。見婦人有微姿者。輒羨之。於是修容飾貌。冀有所媚。伯平

戲謂曰。爾欲爲紅樓之寶玉乎。傳林聞初亦不覺。繼忽怒曰。寶玉曾盜王熙鳳。豈隱刺我盜嫂耶。吾必撲殺此獠。紛呶竟日。闔局如沸。終使伯平謝過而後已。此在蕪湖事也。傳植自以得官不正。必欲傳林博一第。以光門閥。然傳林亦小有才。詩詞駢體皆可觀。獨入股不能就範。忽於光緒己卯捷南榜。人皆異之。後以通判官廣東。遇麻瘋女幾死。補廣州通判。通省第一缺也。補十年始得蒞任。一年卽被劾歸。然宦囊累巨萬矣。後不知所終。

雁門馮先生紀略

馮志沂字述仲。亦字魯川。山西代州人。中道光乙未舉人。丙申進士。分刑曹。篤行好學。手不釋卷。於刑律尤有心得。主秋審十餘年。以京察一等授安徽廬州知府。生平於財帛不苟取。聲色無所好。古文私淑惜抱。以上元梅伯言爲師。以仁和邵位西洪洞董研樵平定張石洲滿州慶伯蒼爲友。皆當時攻經學肆力於詩古文詞者。及出都。爲勝保奏留軍中司奏牘。勝之治軍也。所至無壁壘。兵士皆散處民間。從官皆購



良馬備不虞。蓋賊蹤飄忽無定。一聞警。則騎而馳耳。公獨無馬。一帷車。老驥駕之一牛車。載行李書笥而已。嘗謂人曰。吾不善騎。設有警。墮馬而死。不如死賊之爲愈也。與人交無城府。性情相契。則肝膽共之。豪於飲。善詼諧。備兵廬鳳時。隨巡撫駐壽州。署中不携眷屬。惟以座客常滿尊酒不空爲樂。喬懋懋重其資望。凡捐輸營務報銷。皆命公總之。此在他人。歲入且鉅萬。公但稽核公事而已。羨餘皆涓滴歸庫。人曰。公則清矣。其於後任何。公曰。吾不能預爲後任作馬牛也。同治乙丑夏。雒河告警。捻逆已渡渦。將逼壽州。大軍戒嚴。勤懋督師移駐南關外。刺史施照。良史也。有應變才。檄鄉兵運糧入城。爲守禦計。詣公請登陴聽號令。公曰。吾於軍事未嘗學問。姑從君往。遠眺八公山。色可也。一切布置。君主之。勿以我爲上官而奉命也。於是携良醞一巨甕。墨汁一盃。紙筆稱是。書若干卷。人曰。登城守禦。武事耳。焉用是爲。公曰。我不嫻軍旅事。終日據城樓。何所事。不如仍以讀書作字消遣也。人曰。賊至奈何。公曰。賊果至。卽不飲酒不讀書不作字。又奈何。旣爲守土官。城亡與亡耳。我決不學晏端書守揚。

州。矢遁也。言罷大笑。既而大雨數晝夜。城不沒者三版。渡舟抵雉堞上下。賊無舟不得至。又不能持久。遂退。公曰。此所謂一水賢於十萬師也。有鹽城人孫某者。以鄉團功得縣丞。發安徽。挾吳清惠書投勤慤。留之軍中。供奔走。孫自謂工詩。聞公有文名。挾一卷就正。予時居公署。受業於公。是日見公面客。捧一巨冊。作驚駭狀。大異之。客去。公手一冊至曰。諸公盍觀奇文乎。及揭視。皆轟堂。公亦忍俊不禁。蓋其詩有札飭軍功加六品。借印申詳記宿州等句。如此甚夥。公曰。彼欲我題。何以落筆。既而曰。有之矣。遂書曰。讀大箸五體投地。（五別作武）佩服之至。（佩別作配）反覆吟誦。（誦別作送）不覺毛骨之中。悚出一然。衆又大笑。其風趣如此。一日會食時。有勸之迎夫人者。公曰。內子來。諸公皆將走避矣。衆問故。公曰。內子身長一丈。腰大十圍。拳如巨盃。赤髮黑面。聲若驢鳴。那得不怕。衆大笑。蓋公娶郝氏。同里武世家也。父武進士。兄武狀元。夫人亦有赳赳之風。公通籍後。獨居京師。無姬侍。與夫人不相聞問者三十年矣。聞之公老僕云。蓋奇悍也。公事上接下。無諂無驕。人皆樂與相近。僚屬進見。

無拘束。遇文士則尤加禮。合肥徐毅甫王謙齋皆博雅士也。二人至必設酒食。酒酣必爭論不休。一日者謙齋誤引西洲曲單衫杏子紅爲黃。又引上句爲海水搖空碧。公大笑曰。此二句不連屬。紅不應作黃。罰無算爵。勤慤嘗羨曰。公齋中乃常有文酒之晏。我則軍書旁午。俗不可耐矣。項城袁文誠過臨淮。遣人以卷子索勤慤題詠。乃明季李湘君桃花扇真蹟也。扇作聚頭式。但餘枝梗而已。血點桃花久已澌滅。僅餘鉤廓。後幅長二丈餘。歷順治至同治八朝名人題詠迨遍。勤慤命公詠之。公曰。言爲前人所盡。但署觀款以歸之。予時年尙幼。寶物在前。不知玩覽。可惜也。侯與袁世爲婚姻。故此卷藏袁氏。今不知存否。公有客陳少塘者。故人楊見山所薦。斗筲也。能以小忠小信動人。公委司度支。大肆侵蝕。公知之。或勸公逐陳。公曰。見山端人。且不得意。吾不忍拂見山耳。且吾酒皆陳所掌。但能不竊吾酒足矣。財何足論。公嘗曰。吾生平無他長。惟司文柄。掌刑條。或稱職。乃終身不得衡文。誠恨恨。及權皖臬。平反寃獄無數。有頌其積陰功者。公笑曰。吾無子。留陰功與誰。或天不靳吾年。俾吾多飲可耳。

同治丙寅。授皖南道。丁卯四月。以酒病卒。年五十七。身後惟餘俸錢數百金。藏書數十筭而已。曾文正爲之理其喪焉。後之爲皖南道者。無不滿載而歸也。公清廉出天性。非矯飾者比。尤恨錙銖必較之輩。以爲精刻非國家之福。誠哉名言。公官京曹時。頗嗜碑版書畫。及分廬鳳。則絕口不談。一日有屬吏以宋拓某碑獻者。匣以文梓。裹以古錦。公亟命還之。先君子曰。何不一啓視。公曰。一見則不能還矣。此著名之物。不啓視。尙可以贗本自解。若果真而精者。我又安忍不受乎。受則爲彼用矣。不見可欲。其心不亂。故不如不見爲妙。卒不受。公衣履樸質。除古書佳帖外。無值錢物。予時初學書。公顧而善之。教以用筆與臨摹之法。謂他日必成名家。迄今將五十年。言猶在耳。惜公不得見矣。公手書黃庭小楷一冊贈予。甚精妙。予居公署二年。得公書最多也。公雖膺甲榜。官司道。而非所學。常鬱鬱不得志。讀其詩。可知其大概矣。公貌清冷。長不滿五尺。口能容拳。酒酣輒引以爲笑。每飯必飲。每飲必健談。公嘗曰。吾幼失怙恃。不逮事親。君門萬里。不敢仰望。終鮮兄弟。夫婦失歡。平生所樂。惟友朋之

聚耳。有問公何以無子者。公曰。吾十七歲時。坐書齋。手淫。適一貓驟撲吾肩。一驚而縮。終身不癒。此不孝之罪。百身莫贖也。公著有微尚齋詩五卷。文一卷。皆已梓行。公贖若干卷未刻。身後書籍字畫衣物。皆爲其族子馮焯號笠尉者將去。予自有知識以來。所見文人學士達官貴人商賈負販之徒。其中才能傑出。性情伉爽者。頗不乏人。而揮金如土。不屑較錙銖者。亦有之。惟口不言錢。不義不取。出納不吝。五十年來。僅見公一人而已。豈不難哉。同治間。有與公同姓名者。由大挑補安徽天長知縣。學使景其濬以供張不豐。齟齬之。馮以地瘠民貧對。景大怒。景門生路玉階河南人。安徽已革知縣也。與馮故有隙。又從而媒孽之。馮已受債累。又不堪其辱。投淮河死。有三言絕命詩云。吾遭毀。驚嚇死。路玉階。傷天理。七尺軀。亡淮水。事後英果敏爲景極力彌縫。馮寃終不得白。公言晏端書矢遁事。乃晏爲團練大臣時。守揚州。賊氛已逼。晏在城上思遁。忽曰。吾內逼須如廁。衆曰。城隅即可。晏曰。吾非所習用者。不適意。匆下城出門去。不知所往。晏時由署廣督改副都御史。在籍辦賊也。至今傳爲笑談。

道學貪詐

曾文正之東征也。以大學士兩江總督治軍于安慶。開幕府。攬人才。封疆將帥出其門者甚夥。一時稱盛。有所謂三聖七賢者。則皆口孔孟。貌程朱。隱然以道學自命者。池州進士楊長年者。亦道學派也。箸不動心說。上文正文。文正閱竟。置幕府案頭。時中江李鴻裔亦在幕中。李爲文正門人。楊說有置之二八佳人之側。鴻鑪大鼎之旁。此心皆可不動云。蓋自矜其詣力也。李閱竟大笑。卽援筆批曰。二八佳人側。鴻鑪大鼎旁。此心皆不運。只要見中堂。至夜分。文正忽憶楊說。將裁答。命取至。閱李批。卽問李曰。爾知所謂名教乎。李大懼。不敢答。皇恐見于面。文正曰。爾母然。爾須知我所謂名教者。彼以此爲名。我卽以此爲教。奚挾其隱也。人始知文正以道學箝若輩耳。非不知假道學者。於是有桐城方某者。亦儼然附庸于曾門聖賢中矣。方某聞爲植之先生東樹之族弟。先生得古文真傳。品亦高潔。輿城中桂林望非一族。方某竊先生未刻之稿。游揚于公卿間。坐是享大名。初客吳竹如方伯所。有踰牆窺室女事。方伯善

遣之。不暴其罪也。嗣是橐筆爲諸侯客者十餘年。相傳客豫撫時。嚴樹森効勝保一疏。即出其手。及文正至皖。爲所賞延之幕府。執弟子禮焉。故與李文忠稱同門也。及文忠督畿輔。方某以知縣分直隸。補冀州屬之棗強知縣。予累年奔走京師。與海王邨書賈習。書賈多冀州人。能道方某德政甚詳晰。有富室某獲賊送方某乞嚴懲。方某曰。爾失物乎。曰。幸未失。甫聞穴壁聲。卽搵之矣。方某曰。彼亦人子也。迫於饑寒。始爲此。本縣不德。不能以教化感吾民。吾甚慙。人非木石。未有不能感化者。爾姑將此人去。善待之。曉以大義。養其廉恥。飲食之。教誨之。爲本縣代勞也。可。慎毋以爲賊也。苛虐之。本縣將五日或十日一驗其感格否。富室不得已。將賊去。賊聞方某語。至富室家。頓以賓客自居。稍不稱意。卽曰。官命爾何敢違。富室無如何。又不敢縱之去。懼其驗也。乃輾轉賄以重金。始不問。從此無敢以竊物告者。邑有少孀無子女。有遺產千金。叔覬覦之。逼其嫁。不從。乃訟其不貞。方某逮孀。至謂之曰。吾觀爾非不貞者。爾叔誠荒謬。然吾爲爾計。日與惡叔居。亦防不勝防。設生他變。將奈何。婦叩頭求保護。

方某曰。爾年少。又無子女。按律應再醮。婦曰。醮則產爲叔有矣。方曰。不然。產爲爾所應有。叔不得奪也。婦叩頭謝曰。感公曉諭。願醮矣。方稱善者。再回顧曰。命縫工來。指婦謂曰。以此婦爲爾妻如何。縫工睨婦微有姿。婦視縫工年相等。皆首肯。方曰。佳哉。本縣爲爾作冰上人。即令當堂成禮。攜婦去。命隸卒至婦家。盡取所有。至署中。明日縫工叩頭謝。並言及婦產。方曰。爾得人矣。猶冀得財耶。何不知足。乃爾此金應入公家矣。斥之退。縫工不敢言。婦亦懊喪而已。一日有省員至。方宴之。命行沽。乃薄劣無酒氣。方曰。是沽者盜飲。益以水耳。沽者曰。此間酒無不益以水者。非關盜飲也。立籤提酒家來。責之曰。凡人行事當以誠。誠即不欺之謂。爾以水爲酒。欺人甚矣。且以冷水飲人。豈不病。是乃爾以詐取財也。律宜重懲。命將所蓄酒盡入官。酒家叩頭無算。願受罰。方曰。罰爾若干。爲書院膏火。免爾罪。乃已。縣月有集。集者。平日所無之物。是日皆陳于市。俾鄉民之來購者。不過布帛菽粟之類而已。來者麇聚。方于是日以少許酒食。款鄉之耆老於堂上。畢。出所箸語錄若干冊。遍給之。且曰。此本縣心得之學。



足裨教化。所直無多。爾曹可將去。按都圖散之。大有益於人心風俗也。耆老以爲贈也。稱謝而去。翌日檄諸里長等按戶收刊資。每册若干。又獲金無算。族弟雅南自故鄉來。省兄。意有所白而未言。方一見作大喜狀。曰。弟來甚善。我薄俸所得。惟書數十筒耳。將賚歸以遺子孫。無可託者。弟來甚善。其爲我護此以歸可乎。越日。集空篋數十於堂上。命僕隸具索綯以待。方躬自內室取書出。皆函以木。或以布。往來蹀躞數十百次。堂上下侍者皆見之。有憐其勞欲代之者。方呵之曰。止。昔陶侃朝暮運百甓以習勞也。我書視甓輕矣。亦藉此習勞耳。何用爾焉。裝旣竟。乃以繩嚴束之。即置之廊廡間。非特僕隸等不知中所藏。即其弟亦茫然也。至夜分。方妻密語雅南曰。爾途中須加意。是中有白金萬也。雅南大詫曰。吾所見書耳。非金也。妻曰。不然。金即入書中。函穴書入二大錠。百兩也。雅南大駭。恐途中有變。不欲行。妻曰。爾仍僞不知可也。苟有失。罪不在爾。我之所以詔爾者。俾途中少加意耳。事乃洩。故事。帝謁陵。直隸總督治馳道成。須親驗。是日百官皆鵠立道旁。侯文忠至。方亦列班中。文忠一見即握

手道故。同步馳道上。文忠好詼諧。忽謂方曰。爾官棗強有年矣。攫得金錢幾何。方肅然對曰。不敢欺。節衣縮食。已積俸金千。將寄歸。尙未有託也。文忠曰。可將來。我爲爾賣去。我日有急。足往來鄉里也。方稱謝。即摸索靴中。以銀券進。文忠曰。爾勿以贗鼎欺我。致我累也。言罷大笑。道旁觀者數萬人。皆指曰。冠珊瑚者中堂也。冠銅者方大令也。皆嘖嘖驚爲異焉。久之。以循良第一薦。例須入覲。去官之日。鄉民數萬聚城下。具糞穢以待。將辱之。爲新令吳傳紱所聞。急以敝輿舁方。由他道遁。始免。方懼入都。爲言官持其短長。乞病歸。置良田數百頃。起第宅於安慶城中。又設巨肆於通衢。以權子母。三十年前之寒素。一變而爲富豪矣。迨方死。子孫猶坐享至今日也。予既聞書賈語。詢之曰。何邑人甘受其虐。竟無上訴者。賈曰。彼與中堂有舊。訟亦不得直。且無巨室與朝貴通。何敢也。相與太息而罷。棗強者。直隸第一美任也。有銀南宮金棗強之謠。他人令此。歲可餘四萬金。方與文忠暱。旣無餽遺之繁。又善培克之術。更以道學蒙其面。所入當倍之。蒞棗五年。不下四十萬金矣。方仍布衣蔬食。敝車羸馬。如

常軍興以來。縣令皆有升階。或四品或五品。無以素金爲冠頂者。方則始終七品服也。昔文正幕府人才輩出。軍旅吏治外。前爲二派。一名士派。如獨山莫友芝。邵亭武昌張裕釗。廉卿中江李鴻裔。梅生輩。皆風流儒雅。以詩文名者。一道學派。如徽州何慎修。子永。程鴻誥。伯勇。六安涂宗瀛。朗軒。望江倪文蔚。豹岑。桐城甘紹盤。愚亭。及方菜輩。然何筦蘇州釐政三十年。弊絕風清。死無餘財。鴻誥以校官終。不求仕進。皆卓卓可風者。若涂者。以大挑知縣受文正知。奏簡江甯知府。不數年而蘇松道。而江藩而豫撫。而鄂督。解組歸田。百萬之富矣。又爲子納道員。分江蘇。宣統改元。以侍妾盜其黃金。忿而歸。倪以編修授荊州守。荆故鄂之美任。亦洊至豫撫。兼河督。富亦百萬。有巨宅在江甯城中。亦爲子納道員。分江蘇。子不才。受雅片毒。不能事上。上官亦以其富家子置之。有黃金置篋中。子常枕之。不知中有金也。一日者爲僕挾之去。不知所往。覓枕不得。始悟中有金焉。涂倪之相類。造物若有意揶揄之者。甘令江蘇累權繁劇。沽名之事亦爲之。後以推諉命案爲沈文肅劾免。一孫病不能爲人。竟絕嗣。京

師諺云。黃金無假。道學無真。此之謂歟。

### 滿員貪鄙

穆克登布者。字少若。荊州駐防滿洲旗人。前江寧將軍魁玉之第七子。魁玉隨征粵寇有功。洊至專閩。死。僉果肅建專祠于鎮江。富爲荊旗冠。湖北鄉試。駐防中額。二什之八皆賄得。穆亦其一也。丰姿俊美。長身玉立。見者莫不以爲善氣迎人。和藹可親。不知其陰險忌刻也。以久經閱歷之歐陽霖。且墮其述中。况其他哉。初以道員至江南。劉忠誠蔑視之。穆與布政瑞璋善。瑞貪墨最著。爲穆道地無效。歐之名曾文襄震之。劉忠誠亦器之。穆遂以媚瑞者媚歐。果一言重於九鼎。歐任善後事。不一年。調筦釐政。歐家揚州。母年九十餘。歐性孝。不欲久虧溫清。乞解釐政。而就揚州堤工。堤工遠遜釐政也。並舉穆可當善後事。忠誠皆許之。未幾。穆亦筦釐政。而歐已丁內艱。回籍矣。穆初以歐薦得露頭角。既見歐所造。漸不如己。又加以嚴責其子。恨之。遂寢疏。然猶未肆其傾軋之技也。人有以穆之詞氣語歐者。輒斥之。及服闋。回江南。見穆子。

所爲加劣。復言於穆。迫使嚴束之。毋爲大吏聞。穆於是大恨。同官或有言其子惡者。穆皆以爲歐之播揚。然其時歐固未有職司。無所用其排擠也。會有謠傳通州張殿撰嘗將條陳穆父子惡跡。屬言官糾之。穆大懼。遂乞退。忠誠許之。思釐政爲歐舊任。仍委歐。穆又以爲歐之陰謀。交替日。新舊令尹至不相見。歐亦未之覺也。未幾。剛毅來江南。搜括財賦。欲增釐稅。歐爲民請命。拂剛意。穆遂密言。歲可增緡錢三十萬。歐陽霖欲見好於民。而不顧國計。非忠也。剛於是罷歐而任穆。而宿憾復矣。及剛去。復以民困苦狀白忠誠。以爲剛逼之使然。其實萬無可增之理。忠誠本惡剛。頗然穆言。而不知穆之密言於剛也。穆之再筦釐政也。大肆貪婪。二子尤蹤恣。奔走其門者。皆借風月爲關說地。譚嗣同時以知府候補。挾貴人書求大勝關釐稅。穆嚴詞拒之。有唐光照者。以五千金賄穆子得之。譚一怒入都。致蹈康梁之禍。慘矣。穆且言於忠誠。曰。唐某以徐中堂書來。不敢不奉教。徐中堂徐邨也。穆在京師。曾執贄門下。人皆知之。託言於徐。使人不疑也。其狡如此。有祿德者。亦荊州駐防旗人。進士也。家甚寒。以

穆故。由部曹改知縣來江南。穆委之芒稻河立法橋兩稅關。皆江北最優之地。更番六年。同僚莫不羨之。祿嘆曰。我僅清宿逋耳。若計六年所獲。當可贏十萬餘金。皆爲鄴生蜀生擲之花間矣。於取於携。猶之外府。我與穆本爲親故。又受其培植。何敢與較。傷哉。我浪得虛名耳。祿未至。儀徵令之前。在江甯爲人言者。鄴生文達。蜀生文錦。即穆之二子。皖人陳靜潭。孝廉。常以擊畜呼之者也。朱寶森。張景祐。皆暱於擊畜。凡擊畜冶遊之地。如鎮江。如揚州。如金陵。所費皆二人任之。任情揮霍。一擲千金以爲常。此歐陽霖所以自恨無知人之明也。淮安稅關者。特簡內務府司員爲監督。已二百餘年矣。新政行爲外人所詬病。廷議改歸江督委員監收。比武昌蕪湖例。部議以淮揚道淮安府按年輪直。穆夤緣總督。請加派監司一員專司之。蓋言道府皆有專責。恐不能兼顧。反滋流弊。奉俞允。即以穆當其任。於是者四年。皆相傳獲三十萬金也。乃起巨第於金陵。購物產土田於沿江繁盛之區。其他銀行鹽運皆有巨資。爲江南監司中首富矣。權徐州兵備年餘。豐碭之雅片。亦存儲數千斤。革命軍起。金陵光

復穆所存推片擲道旁無數也。歲丁酉。文錦以捉刀捷京兆。納知府發浙江。不二年。爲言官劾罷。永不叙用。至宣統二年。文錦又復職請覲矣。朝廷黜陟無權。親貴苞苴有價。可歎哉。穆初司釐政時。有韓某者。庸妄人也。筭鑣捐事。上書言歲比不登。稅不足額。蒙允移善地感甚。茲上盈餘千金。願充公用云云。穆批答嘉許之。未幾。又上言千金想蒙察收。久不見調。不知何故云云。皆印文。非私函也。第二次書至。時正歐陽霖再任受事之日。霖一見大詫之。觀前書更怒曰。安有苞苴橫行。居然形諸公牘者。安有正稅不足。而有盈餘者。遂揭參革職。穆又謂霖揭其短。更恨之。及霖罷。遂與霖絕。辛亥八月。革命軍起。穆長兄札拉哈哩在鄂全家被劫。僅以身免。穆家江甯亦率妻孥遁上海。城破之日。家盡燬。第宅爲墟。或云父子皆遁日本。不知所終。

### 滿州老名士

炳成字集之。五十後號半聾。以左耳重聽也。爲清肇祖後。世貴顯。父桂昌。道光初爲浙江糧道。擢甯紹台道。以治戰艦不如期。爲欽差賽尙阿所逼。自經死。伯父桂清。以

都御史訊獄湖北道卒。諡文清。家雖貴而貧。炳成幼好學。無貴介習。尤好金石書畫。童年見桐城吳康甫先生。吳敬之。吳時年二十餘。爲杭州府知事。炳從其習篆隸。識鍾鼎字。學篆刻。年旣冠。遭家難。浙之人士憫桂昌清貧。醵二萬爲贖。炳成遂奉母携妻子還京師。以八旗貴胄浮薄無文采。不願與往還。而獨與漢人士相歛洽。初居宣武門故第。極亭臺花木之勝。迨母沒。僅妻與子三人耳。又少僕從。遂貨其居。挾妻子賃居南城外龍樹院之東偏天倪閣。炳之返自浙也。營葬畢。不事生人產。又座客常滿。尊酒不空。有古瓷酒杯三百器。號三百杯齋。不數年。裘敝金盡矣。以廕爲都察院筆帖式。四十年不遷。鬱鬱以終。故事。戶部銀庫司員。三年一更替。司庫一缺。選各署資深之筆帖式爲之。歲可贏千金。其族子某爲某部筆帖式。資與炳埒。少數月耳。極力營謀不能得。而炳成適當選。炳不知其猶子之謀也。三年期滿。始知之。盡舉所有以與猶子。弗顧也。人以是尤重炳。炳狂傲。嘗蔑視上官。以爲不足與語。國初故事。設有司屬與堂上論事久。得自挾坐具席地坐而言。此猶未入關時毡幕中舊習。而曾



典既未刪除。亦未聲明。一日者。炳故擇一長言之事。挾坐具懷會典以往。見都憲立談良久。忽設坐具坐于地。都憲大詫。將斥之。炳以會典進。都憲瞠目以視。而無如何。同僚咸以爲玩世不恭也。子年十五。晝夜課之讀。舉十三經皆背誦如流。猶以爲未足。更以國語國策史記督責之。子不堪其苦。嘔血死。妻痛子亦殞。炳乃大悔。獨居龍樹院。踽踽涼涼。淒然寡歡。時止於光稷甫先生家。予初至京。即於先生家見之者也。繪天倪閣圖冊以悼亡。徧徵題詠。其爲人也。一介不取。故舊資以金。皆不受。歲入俸四十餘金。不足則鬻書畫以益之。雖至交如光。亦不受其尺絲寸縷也。能飲健談。尤熟於國朝掌故。嘗言品花寶鑑小說。出於道光中葉。其時正隨父居杭州任所。著者挾貴人介紹。以稿本遍閱江浙諸大吏。所至以旬爲限。獲金無算。其書中人有身見之者。華公子者。崇華岩。父名玉某。兩任戶部銀庫郎中。集資百餘萬。有園林在平則門外。華公子死。貧無以殮。徐子雲者。名錫某。六枝指。其園即在南下窪。名怡園也。田春航者。畢秋帆制府也。侯石翁者。袁子才太史也。史南湘。蔣苕生也。屈道翁。張船山。

也。孫亮功者。穆揚阿。慈安后之父。嗣徽嗣元。即其二子。四山五山也。魏聘才者。常州朱宣初。卽江浙時文八名家中朱雪塍之父也。蕭靜宜者。或曰江慎修也。梅學士。或曰鐵保也。奚十一者。孫爾準之子。爾準時爲兩廣總督也。潘其觀者。內城內興隆靴肆主人。姓蘇也。梅子玉。杜琴言。皆無其人。隱寓言二字之義。高品者。名陳森。書。卽著書之人也。伶人袁寶珠。則仍其姓名。雲南甘太史爲之自盡者也。其餘諸伶皆原姓名未改也。宏濟寺卽興勝寺。金粟者。卽桂竹蓀。曾權常州知府。遭吏議者也。其餘如王恂。顏仲清。皆隱當時名人。不可縷紀也。又言紅樓夢一書。實隱國初宮闈事。非明珠納蘭成德之事也。其賅洽如此。光緒丁戊間。京師有歌舞妓厭風塵。欲擇人而事。一日於座上見炳。大悅。以爲可偶。遂委身事之。生一子一女子。名增蓼。年十三亦畢五經。並爾雅儀禮皆成誦。爲國子監官學生。凡旗生無與匹者。及壯年時。選護軍。乙未予出京。遂與炳長別矣。其子自炳沒後。奉母遷居內城。遂不知所終。炳好讀書。手不釋卷。凡有心得者。輒手錄之。名之曰我愛鈔。積十餘年。得巨冊厚尺二許。沒時鬻

藏書以殮。此手鈔者。未知尙存否也。予時不在京。不能以重價易。此可惜也。炳有一可笑事。其妾言於光妾者。炳性僻。不能與人同衾臥。每晚飯時。必使其妾遞戒指。如宮中遞膳牌例。若留侍。則留其戒指。事畢。卽遣去。或天癸期。則免遞。其可笑如此。光侍御爲予言。皆不禁大噱。予戲曰。此龍子龍孫法乳也。因附志之。

### 文章挾制

懷寧有楊秉琦者。禮南學士秉璋之九弟也。幼隨兄官京師。從瑞安黃漱蘭學士體芳攻舉業。學士時文名家也。門牆甚衆。同時有廬江人章珩者。字蘊卿。富室子也。以資爲戶部郎。亦負笈從黃遊。與秉琦有戚誼。叔之。至相得。凡學士所改課作。彼此皆互相留稿。以資揣摩。同治庚午科。秉琦恐兄入闈須迴避。乃出京就本省試。是科順天首題爲季氏使閨子。鸞爲費宰全章。黃曾改秉琦課作。極佳。章珩携入闈錄之。得中第十名。刻入闈墨。珩父恐秉琦揚其事。手千金贈之久之。學士死。秉琦屢試不第。其爲人乖謬成性。好惡與人殊。妻死無子。遂隻身走金陵就章。先是章捷後。同鄉皆

訕笑之。龔引生比部。竟於晏會時面誚焉。章恐爲言官上聞。與大獄。遂改道員分江蘇。其時曾忠襄督兩江。章挾權貴書以往。未幾遂得筦籌防局務。金陵城中道員第一美差也。當秉琦之造章也。謂章曰。我貧而病。又無子。將就養於爾。爾當能奉我。以終也。章唯唯。竊怪之。然不敢慢。闢精室處之。飲食起居。事事維謹。少不遂意。則必呼章而責之。如父之訓子然。章有婢美。秉琦欲之。即遣事焉。日者章自上海返。携廣東籐椅八。甚精美。琦秉見之。命留其半。章曰。此我購以奉帥者。叔愛之。當別購以進。秉琦曰。爾視我不如帥何也。章曰。非帥以一紙與我。安得此美任。秉任曰。我豈無一紙與爾耶。章無言。如是將十年。秉琦死。章爲營喪葬焉。僕婢皆尤之。曰。主人徒多此一策耳。而遂受挾制終身何爲哉。有榜下知縣周某者。貴州人。以初抵省謁章。諛之曰。職未第時。卽熟讀觀察闈墨。誠名家也。章以爲誚己。大怒。變色而起。即傳呼送客。周惶懼不解。及出。詢之皖人。始知其故。自是僚屬無敢以文章頌章者。

肅順軼事

清咸豐十一年。各國聯軍入京。文宗挾后妃等走熱河。未幾崩。及梓宮還京。那拉后遂斬戶部尙書宗室肅順於菜市。清祖制。凡宗室有罪。皆於宗人府賜自盡。不刑於市。此次不遵祖制者。以叛逆論也。肅既伏法。京師人莫不以爲大奸之除。非那拉后不能有此剛斷。頌聲徹上下。嗚呼。豈知肅順有大功於國。實隱成中興之業哉。咸豐間。左文襄會試入京。伏闕上書。痛陳時事。多觸忌諱。文宗大怒。革舉人。命順天府五城逮捕治罪。旨未下。肅陰命文襄逸。次晨旨下。而文襄已出國門矣。肅與文襄初未謀面也。曾文正皖南之敗。退守祁門。劾者紛起。廷議將改簡。肅大言曰。勝敗兵家之常。臨敵易帥。兵法大忌。不如使之帶罪立功可也。文正遂得一心於兵事。卒平大亂。當欽差大臣向榮之沒于軍也。肅力舉張忠武國樑繼其後。文宗將許之。時長洲彭文勤蘊章在樞廷。文宗問彭曰。爾以爲如何。彭曰。張國樑究係反賊投誠。其心叵測。乃簡和春繼向任。而江南軍事大壞。庚申大營潰敗。張忠武陣亡。和亦畏罪自盡。兩江總督何桂清亦逮問伏法。向使從肅言。則張武忠必能支持。待曾軍南下。合圍金

陵。決無江浙兩省之糜爛矣。肅之才識。非有大過人哉。直至今日。天下無知左曾二公。隱爲肅所用者。徒薪曲突。功人無功。千古傷心矣。世之罪肅者。以其盛氣凌人。驕恣不檢。遂並其功而沒之。不知盛氣驕恣。乃親貴之常態。但使有功於國。其他可末減也。肅極喜延攬人才。邸中客常滿。皆漢人也。湖口高碧湄大令。會試在京。肅聘爲記室。欲以狀頭畀之。庚申高中式。迨殿試。適肅奉命爲收卷大臣。慮有優于高者。欲困之。遂下令曰。下午四時不交者撤卷。乃未晡。即有交者。視其名。鍾駿聲也。通篇七葉半無一補綴。肅不覺大慍。即受而置之靴中。旣畢事。亦忘之矣。歸邸脫靴。始見之大駭。即遣騎馳送閱卷處。閱卷大臣以爲必肅所注意者。遂以一甲一名進呈御覽。而鍾竟得大魁矣。及遍覓高卷。乃知亦在撤卷中。蓋高作字甚緩。日將沒。猶未畢。遂一例被撤。而肅不知也。及朝考。又以出韻置末等。以知縣發江蘇。補吳縣知縣。有強項聲。肅之愛才多此類。如陳孚恩。匡源。焦佑瀛。黃宗漢等。皆肅所舉也。而獨不喜滿人。常謂滿人胡塗不通。不能爲國家出力。惟知要錢耳。故其待滿人。不如其待漢人。

之厚。滿人深惡之。及文宗崩。穆宗幼。那拉后名位又卑。常藐視之。言者論其有窺竊大位之志。非無因也。肅隨文宗之幸熱河也。常戲坐寶位。謂人曰。似否。那拉后甚忌之。肅每晨未起。坐帳中。卽飲人葠汁一杯。有小內侍專司其事。杯爲和闐羊脂玉所製。文宗賜也。一日小內侍誤碎之。大懼欲逃。有老監某教之求陳尙書緩頰。陳尙書卽孚恩與肅最莫逆者也。孚恩授以計而去。小內侍歸。黏以膠。次晨仍貯葠汁以進。甫揭帳。卽驚呼仆地而擲杯焉。肅怪之。對曰。適見爺兩鼻孔中有黃氣。二如龍狀。長五六尺。故不覺駭而碎杯也。因請死。肅曰。速起。毋妄語。何懼爲。竟不問碎杯事。肅自是隱然以爲有天命焉。故文宗晏駕。肅命改元爲祺祥。穆宗立。始定同治年號。其舉動之躁妄如此。肅之臨刑也。穢語詈那拉后。劊子以刀築其口。齒舌皆糜。猶噴血而詈焉。自是朝中大治。肅黨凡爲所賞者。皆禁錮終身。然皆有文武才者也。相傳肅之生也。有冤業焉。肅爲鄭親王烏爾棍布之孽子。母回女也。先是王下朝。途見一女。甚美。命心腹包衣趙姓者往探之。欲購爲妾。乃知女幼已字人家。粗給。無與人爲妾。

之理。王大懊喪。必欲致之。多金非所吝。趙請緩圖。王不許。予三月限。趙於是僞爲革退者。卜居於女之鄰。與女父締交。時助其緩急。誼若管鮑。女父母皆感之。然於女仍無術以致之也。期已迫。王忽奉旨管步軍統領事。受事三日。有以獲盜解署者。趙大喜得計。賄盜使言回。回爲窩主。於是女父與諸盜駢斬于市。趙厚爲之斂。且周卹其母女。又使人僞爲女父貸券。登門追索。趙又爲清償。於是母女感之。次骨。趙又陰使惡少時登門調女。又陰使人誣其不貞於壻家。壻乃退婚。而母女益大困。商於趙。趙曰。何不進女。即王不但母女得所。且可享富貴。計莫此之善也。乃飾女以進。王大喜。重賞趙。次年卽生肅順。未幾。王患頸疽而死。如斬然。俗呼落頭疽也。使劊子縫其項。乃能殮。蓋京師惟劊子擅此技也。可異者。趙亦患頸疽而死。以至於肅順之斬。論者以爲有天道焉。吁。異矣。保全左曾及舉張忠武。聘高碧湄。碎玉杯等事。皆炳半龔爲予言。其父誘買回女事。聞之江寧鄭受之部郎。轉聞之肅邸中者。

楊查孽緣



楊鼎來。字小匡。淮安山陽人。才子也。兼精拳勇。能百人敵。幼隨其父蘇州校官任。署隣查姓者。浙江海鹽巨族。與校官至交。眷屬相往來。有女幼而有才。嘗來署與楊同嬉游。兩小固無猜也。楊能詩。女亦能詩。唱酬無虛日。楊固未聘婦。而女則已字吳縣潘祖同矣。雖彼此有情。格于禮法。不能通婚。祖同父侍郎曾瑩在籍時。楊曾受業門下。及弱冠。娶彭氏。彭時爲京官。楊走京師就婚。遂館於潘氏。時女已出嫁。祖同亦入翰林。咸豐己未。楊中順天副榜。已與女通。至甲子。又中鄉舉。其年祖同因事革職。遣戍。兄祖蔭。又由侍郎降編修。驟失勢。楊遂無所顧忌。然其師曾瑩固在也。以侍郎退休。就養于京。一日見楊與女唱和詩。語多狎褻。遂楊出。次年楊會試不第。竟夤夜踰墻入潘宅。負女遁。潘氏聘拳師五人。使於中途殺之。追至楊柳青。見楊與女疊騎而馳。五人皆敗而還。楊遂安然歸故鄉矣。於是潘氏父子遍告同鄉故舊。聞者皆惡之。朝臣相戒。如會試得楊卷。卽抽換。不使淫凶得志也。無何。楊竟于同治戊辰復入京應試。乃拆彌封。楊第在名九。已進呈御覽。不能易。例如放榜前數日必將擬中之前十本進呈候欽定也遂

更相戒於殿試時。抑之。楊素工書。師米襄陽。人皆識之。至是楊作變率更體。衆果不察。進呈前十。本楊之卷又在焉。朝考時始抑入三等。猶得用主事。分工部。楊自知不容於清議。不復作春明之夢。遂歸築精室於淮之河下。與女居。日相唱和。享閨房之樂二十餘年。授徒以終。淮之人呼女爲湯夫人。蓋合其二夫之姓之半而謔之也。楊自書楹帖榜其門曰。文章有價。陰隲無憑。女先楊數月死。楊挽以聯云。前世孽緣今世了。他生未卜此生休。能於無可著筆之中。曲曲傳出心事。可謂才人之筆。淮之人述女贈楊會試送行詩云。淮水清清河水渾。安排行李送王孫。明年三月桃花浪。君唱傳臚妾倚門。風致甚佳。然含蕩意。一望而知非貞婦也。嗟乎。人禽之界。一念之間耳。楊具文武才。使其發乎情止乎禮義。則儒林也。名相也。大將也。楊皆優爲之。乃一念之差。縱慾敗度。遂入于衣冠禽獸之途。而不可救藥。吾甚爲楊惜也。聞女並不美。且面有痘癍。惟多才耳。自楊中會試後。朝中大老主會試者。得淮安卷輒擯之。如是者幾二十年。以爲淮之士人皆如楊也。有吉元者。亦山陽名下士。坐是困春明終其

身恨楊次骨。楊爲山陽世家。五世皆進士。亦難得也。然至楊斬矣。楊妻彭氏。與所歡查氏各生一子。皆不能繼楊業。聞之泗州祁頌芸云。

### 神經病能前知

楊州謝夢漁侍御。清道光三十年庚戌科一甲三名及第。書法甚劣。二甲且不能望。竟問鼎焉。蓋是年殿試之日。猶在宣宗大行百日內也。士子皆素服入試。於策中照例擡寫處。多未留意。惟謝卷遇擡寫皇上陛下之上。必加當今二字。通場所無。諸大臣以爲得竅。擬置狀頭。以字太劣。置第三。京師人呼爲兩字探。花惜仕途。躑躑終于御史而已。謝之爲人無可議。惟似有神經病。多作可解不可解。語往往能前知。嘗一日謁一宗室。其人並非顯者。坐甫定。閹人進言青麀傳到。宗室立命之入。謝意青乃侍郎。且翰林前輩。彼豈能傳之。或另一人耳。及入。則即侍郎而前輩也。皇悚避席。宗室曰。彼在我處無坐位。爾不必謙。即回顧青麀。聲色俱厲。大加申斥而去。謝出謂人曰。我觀青老前輩將不得其死。人曰。青久蒙簡在。即將外任封圻矣。謝曰。放出去更

不得其死。不如死于旗主之逼。猶不害人。衆以謝嚙語也置之。未幾青果得湖北巡撫。以粵逆陷城失守。伏法。謝之言竟驗。咸豐壬子科順天鄉試。四月攷差。謝不赴。人勸之。謝曰。我一生無差運。故不考。至秋。同鄉京官宴士子於會館。甫入坐。空中有鴉飛鳴一聲而去。謝瞿然驚曰。今科我揚只中一人。可惜可惜。人又以爲嚙語也。及榜發。果中方鼎銳一人。謝言又驗。銀臺儀徵胡隆洵之入都也。並行李而無之。投會館。長班以無行囊不納。使之謁直年者。取進止時直年爲陳六舟中丞。胡往謁。陳細詢之。知爲諸生。遂留宅中。司筆札。試以時藝。則不佳。陳曰。旣欲應試。非用功不可。於是督課甚嚴。親爲改削。一日謝至。熟視胡。問謝曰。此何人。謝曰。吾鄉應試者。然不能望中也。示以胡文。謝曰。此可中矣。在他人固無望。然在胡不必佳也。爾以爲必佳。文方可中乎。相與拊掌。及謝出。陳謂人曰。謝老前輩戲言也。不可爲後生法。是年爲同治改元壬戌恩科。秋闈胡報捷矣。胡于是意得志滿。終日應酬奔走。無暇伏案。陳督責之。亦不聽。逮癸亥會試。首題爲大畏民志。此謂知本。懷寧楊禮南學士爲同考官。已

撤堂矣。同考中有孫觀者。與楊同鄉至好。得一佳卷。欲補薦。挽楊爲伴。楊不得已。隨手取一落卷。加一游批。陪孫上堂。孰知孫薦被擯。楊薦竟入彀。卽胡卷也。照例於放榜後。各房考先自磨勘一次。楊勘至胡卷。大駭。惶愧萬狀。隨呼奈何。人問之。閱其中二比起句。皆不覺大笑。蓋出比起句曰。蓋在夫子。對比曰。而在民也。又無法爲之改削。惟不刻入同門錄而已。胡以爲我亦送板價與老師。而不刻我文。是輕我也。從此師生無感情焉。胡用主事分吏部。後升至通政司參議而終。謝之言又驗。謝居京三十年。宴客之事寥寥。將歿之前一月。忽折簡遍邀同年同鄉至好者。大宴于松筠巷。卽楊忠愍公祠堂也。衆異之。屆期往。則十餘席。珍羞羅列矣。皆論曰。公今日何事。盛設宴。謝曰。我將與諸君永別。不得不痛飲一回。以當離筵也。衆笑曰。公何以知之。謝指忠愍神主曰。此我故人也。昨夜入夢相告。故知我辭世不遠耳。皆颯然盡歡而散。果不一月而訃至。謝沒後。囊橐蕭條。老妻以哭子早喪。侍御有子。於粵寇陷揚州時。乳母携之逃。遂相失。謝屬續時。謂所親曰。他年吾子來京。望諸公善視之。衆唯唯。

然皆知其無子也。及歿年餘。忽有老媪携童子來京。遍叩同鄉之門。謂是謝子。述避寇年月甚悉。以久不得主人消息。故未來。今聞人言主人在京。不料子來而主人死。並言謝家事甚悉。遂釀金教養之。及長。屢應試不售。就館職。得知縣。歷任順天繁劇。有能聲。宦橐甚豐。以道員卒于京。卽謝星菴也。吁。異哉。論謝之品學。皆爲人所稱許。獨其有先見之明。而故作不倫不類語出之。豈悟道者耶。抑其人果如佛家所云有來歷者耶。予在京。歷聞揚州人云。遂拉雜記之於此。

### 貴女殺親夫

榕興字吉孫。滿洲人。江蘇候補知府也。年三十一。妻爲前清兵部尙書鐵良之姪女。年二十九。榕需次蘇州時。納一妾。極寵之。因是不與妻共枕席者五年。光緒三十四年春。奉委荷花池釐差局。在北岸瀕江。屬鎮江境。乃携家居。差次有薦司事與榕者。曰周鳳魁。無錫人。少年美丰姿。善修飾。五月始至。未浹旬。卽與榕妻通。榕知之。懼于闖威。不敢言。忿而致疾。宿于外寢。榕有一子。妻出也。已六歲。將拜周爲假父。擇期六

月二十六日。設宴稱賀。先期妻謂榕曰。二十六日將大治具。汝能稍飲一杯否。榕不答。至二十四日。榕覺疾甚。如癩狀。次晨。妻忽造榻。殷勤慰問。並勸之食。榕夫婦積不相能。已五年之久。至是人皆異之。是日慰問至八九次。至黃昏。又手粥一甌。力勸加餐。榕不忍却。遂噉之。未三更。死矣。七竅皆有血。舌紫黑。醫者以銀針探其喉。作黑綠色。皆知其中毒也。走告妻。妻若不經意者。猶手風琴而歌。周坐其旁。稚子倚周膝而嬉。妾聞之。奔至榕寢。撫屍大慟。爲之洗滌血汗。手自含殮。而二十六開筵拜假父之舉不成矣。閤局之人。大動公憤。誘周至江南岸。而痛撻之。並勒其供狀。歷述通姦謀斃始末。有高姓者。北人也。性愚直。將執狀控于官。尼之者。謂不合法律而止。當道又礙于鐵良。不欲彰貴家之穢。僅遣人送其子與榕櫬回旗。即周鳳魁亦倖逃法網焉。噫。大員之妻。謀斃親夫。若斃一犬然。誠世界罕見之事也。清律。凡捉姦者。必於姦所。雙執之。又必其本夫或其父母始可。卽翁與伯叔兄弟。皆不得而捉之也。又曰。指姦勿論。以其非親見於姦所也。若外人告姦者。有禁。恐其妬姦。或誣姦也。此高姓之控。

所以不合法律也。

名士遇鬼

朱銘盤字曼君。江蘇泰興人。記誦淵雅。文詞典贍。光緒癸巳舉孝廉。瑞安黃漱蘭學士督學江蘇時。拔高才生。肄業南菁書院。廬江吳武壯長慶聞其名。聘爲軍中記室。與今張季直殿撰同掌機要。武壯賓師之。不以屬吏待也。會武壯卒。所部有欠餉未放者。朱代領萬金昇至舟。待發矣。蓋朱又爲駐旅順淮軍將領張某所聘。亦武壯舊部也。盜偵知之。亦附其所乘之輪船而行。見其昇銀至家。遂往約他盜夜劫之。不知朱昇至家後。忽轉念不如昇往軍中爲妥。盜不知也。至夜。盜數十人破扉入。覓銀無有。詢朱。朱曰。此軍餉也。已昇至營矣。一盜將刃之。前隨之盜曰。不可。我輩與朱某無仇。何必血刃。遂刼其衣物少許而去。次晨。卽報張緝之。獲七人。前隨之盜亦在其中。蓋亦武壯革退之兵也。盜直陳不諱。並云。我輩最忌空過。故刼其少許物。計不值百金。無死法也。且我尙有德于爾。爾亦當以德報。張回顧朱曰。如何。朱曰。爾按軍法辦。



理可也。何必問。張不得已。駢斬之。未幾朱妾生子。彌月之期。大開湯餅宴。賓衆雜沓。朱抱子出示衆賓。時朱年已逾四十。始得子也。抱而入。甫至廳事後。忽聞朱狂呼曰。勿傷吾兒。旋聞兒亦狂啼一聲。戛然而止。衆趨入視。朱僵于地。兩目直視。歷叙殺盜事。又云我錯我錯。乞恕我子。須臾氣絕。更視其子。亦死矣。此甲午冬月事。予時客煙台。東海關道劉薊林觀察署中。有友人自旅順來言如此。皆以爲盜索命云。觀此與王萬青二事。中國豈果有鬼神哉。所以近年西人之講哲學者。亦皆主靈魂之說也。

### 猴怪報怨

前清光緒季年。直隸鹽山縣令史某。杭之錢塘人。無錫王壯武公之孫婿也。署中庖人楊大者。有童養媳年十五矣。尙未成婚。忽一日覺有人與同臥。始尙隱約。繼更近。睭詢其何氏。答曰我侯氏女銀針也。汝三世前邵姓。爲錢塘令。我其時亦士人女。因見惡於賣花媪。彼遂誣予不貞。壻家聞之。遽退婚。父不服。訴之官。官受媪賄。誣予非貞體。予遂自盡。此雍正間事。予死後。閻羅憫予屈死。命轉世爲男子。富且貴。予不願。

但思報仇。閻君謂邵令已墮畜生道。爾恨亦可洩矣。不如轉世爲佳也。乃投生中州。貴人家爲人。既長。迷失本姓。無惡不作。及壯而夭。閻君怒。謂亦當墮畜生道。予大哭。但求復仇。遂轉世爲猴女。猴父母皆修練成道去。予同胞尙有一弟一妹。皆能修練。先予得尸解。惟予以心懷復仇故。道念不及弟妹之堅。遲之數十年。亦得尸解。遍覓仇人。知爾今生爲楊氏婦。故來覓爾。然吾母與妹皆常來防守。不令我索爾命以爲冤。宜解。不宜結也。自是附婦體不去。闔署之人皆矐之。令之女兒輩呼之爲銀針姊。幼者姑之。與人接談。恭而有禮。母與妹亦時附婦而言。獨銀針有時作空中笑語聲也。令之諸女有欲見其面者。女曰。我一猴耳。何足觀。再三請。女曰。無已。可於帷後觀。予足可也。則見一足弓鞋窄小如菱。履製亦精美。一足則大如蓮船盈尺。皆闔堂大笑。壯武之孫。名恕。字心如者。蓋臣同守之第三子也。時在署。女亦常與欵洽。一日。恕問女曰。爾母爾妹則常來。爾弟何不來。女曰。但聞其轉世爲大貴人。今在湖廣大衙門。亦不知湖廣爲何地也。問姓名。曰。不知。但知其爲湖廣最大之官耳。忽一日。戲謂

恕曰。三舅老爺我爲爾妾如何。恕笑曰。我不慣看猴子面目。女曰。我能變形也。然亦祇能變一小時耳。不能久也。楊大夫婦敬之如神明。稱爲仙姑。令有小奚奴謂楊曰。一猴怪耳。何足畏。爾俟其空中發聲時。循其聲抵於壁。我以棍擊之。可使其現形也。語未畢。忽自批其頰無數。且自投曰。爾以後再敢狂言否。奚奴大懼。跪而哀告。乃已。如是者五年而去。並不爲婦禍。惟婦體羸瘠耳。女作杭音。聲直而轟。其母妹皆然。此心如爲人言。蓋於鹽山署中親見之者。據女言。則人云張文襄前身爲猴。非虛言矣。文襄之貌似猴。飲食男女之性無不似猴者。亦奇人也。予所紀不載虛渺神怪之迹。惟此乃近年事。且王君兄弟所目擊。言之鑿鑿。當非妄語。故記之。此吳騫傳信錄例也。

### 前世冤鬼

葉伯庚江寧廩生也。頗有文名。光緒二十三年丁酉。各省鄉試之年也。其秋葉忽病。旬日不醒。嘗喃喃自語。作湖北鄉音。人問之。答曰。我周呂氏鬼魂也。嫁周鳳奎爲妾。

道光中。周以甲榜爲福建閩縣令。因口舌細故。忿而縊于鳳凰山之銀杏樹下。山即在縣署後。周知之。不使歛。致屍飽虎狼。周轉世爲葉。今科將中江南第四名舉人。予得請于帝而索命焉。一家大恐。許度脫。鬼曰。我亦不能遽斃之。緣渠曾辦振飢事。有微勞。上帝亦許貸其死。惟不使之入場耳。家人環求不已。鬼又曰。祀我。並使某高僧誦楞嚴經千遍。則我去矣。如其言。至八月八日。貢院封門。而葉病愈。訪之閩人。果有閩縣令周鳳奎其人者。逾年爲光緒二十四年。葉辦擋入閩。訪詢周呂氏事。竟無人知。至鳳凰山。果有銀杏樹。百年外物也。於其地招魂立冢而歸。其時余在金陵。葉親爲人言。此事甚可怪。葉不致造言以自污也。

### 鬼捉酷吏

時乃風字蕙卿。浙江仁和人。江蘇候補知府也。筦閩行鎮釐稅。會幫辦委員倪祖謙家被盜。鳴官捕數人。內有護卡砲艇勇丁焉。艇有哨弁。素與時有隙。時遂誣以坐地分贓。言於撫院巡捕官申保齡。申白巡撫吳元炳。遂駢斬之。未幾。申權吳江知縣。甫

匝月而病。病中喃喃辯殺盜事。遂死。死後數日。時又權松江知府。甫三日。一日送客出廳事。杭聲大言。若對客狀。僕以客去告。則大怒曰。我正與申大令言。何相溷也。俄頃面目慘變。自投無數而死。此同治戊辰己巳間事也。石埭徐子靜言。

### 翰林不識字

自科舉廢。倡言新學。凡留學日本三年畢業歸國者。送部應廷試。或賞翰林。或進士。或舉人。皆出於一榜焉。此從來科名未有之變局也。光緒末年。有粵人某廷試得翰林。呼何秋輦中丞爲秋輩。讀奸宄之宄爲究。予初以爲言者過甚耳。迨指其人而實之。始知不謬。吁。此亦國之妖異也。安得不亡哉。

### 妖狐爲祟

同治季年。蕪湖有釐卡委員俞某者。浙人而北籍也。婦爲狐所憑。夫入房。輒有物擊之。遂不敢近。在蕪湖時。一日清晨。有僕婦入房灑掃。忽見一壯年男子。冠白毡冠。衣灰色繭綢袍。腰繫大綠皮菸荷包。坐主婦床上。大駭。欲詢。轉眼即不見。俞自北南來。

此狐卽隨之而至。歷有年所矣。婦日漸枯瘠。遂死。愈亦無子。予其時亦在蕪湖。一時喧傳以爲怪事。

### 方某遇狐仙事

道光間方某。皖人寒士也。入都應鄉試。館某旗員家。書室在花園中。園故空曠。僅一館童作伴而已。一日月下。方仰天長歎曰。家無擔儲。功名未遂。昨有家信來告。匱奈何。忽空中有答者曰。公富貴中人也。何憂貧。公無患家計。我已爲公備銀二十兩。爲家用。明日封寄可也。方大駭。不敢應。遂歸寢。次晨見案上封裏。宛然視之。銀也。權之得二十兩。大喜。遂寄家焉。晚坐月下。望空稱謝。又聞人語曰。公長者。願與公爲世外交可乎。方曰。可。叩其姓名。曰。胡某。爲大內管庫職司也。是年方捷順天。胡又爲摒擋一切。費不貲。方深感之。次年會試後。遂移居試館。不復館旗員家矣。及聯捷。又助之。且時來與方談論。今古頗淹洽。惟不見形耳。方頗以不得一面爲恨。胡曰。無見面緣也。方固請。胡曰。不得已。可於某日午後俟我。屆期戒闈者。凡有客來。皆辭謝以爲今。

日可以見我良友矣。至午後。忽座師傳喚。命卽至。方大恨。然座師命不敢違。怏怏行甫出門。胡卽來投刺而去。至晚方歸。僕曰。午後有一人白而頤。四品冠服來拜。素不相識也。方領之。至夜。胡至。謂之曰。如何。我固謂無見面緣也。久之。胡忽語方曰。我輩交誼可謂厚矣。欲附爲婚姻可乎。家有弱妹。貌頗不惡。堪備箕帚。方曰。我有婦矣。胡可者。胡曰。不妨。我輩世外人。不爭名分。公卽妾之可也。方曰。容徐議之。次日。方出門後。有一李姓來拜。歸視名刺。不識也。至夜。聞空中有聲。非胡聲也。問爲誰。答曰。卽日間奉拜之李某也。某亦狐而仙者。久欲奉教。未敢唐突。今聞胡某欲以妹許公。明知交淺言深。公未必信。然視公之危而不救。實不忍。胡妹雖美。而淫蕩已盡。死多人矣。公奈何墮其術中。不如設詞拒之。爲是。方大驚。謝。翌日。胡又至。申前說。方絕之。胡詰其故。方曰。我雖貧。究人類也。豈可與君輩爲偶。胡大怒曰。相交許久。猶以我爲畜類耶。作恨恨聲而去。自是。遂日作祟。無虛日。或食物中置糞穢。或衣服無故自焚。或朋友求書之件。污以墨水。種種惡作劇。不堪其擾。方恨之而無如何。李又至。教之曰。爾

第焚疏于前門關帝廟。彼自懼而不敢崇矣。方如言。至夜夢一三十許方面壯夫。鎬鏑被體。戟指向方曰。爾受李某讒。控我于神。我待爾不薄。計我所毀爾之物。尙不敵贈爾十之一。爾何忍乃爾。爾知李某爲何如人。大內庫掌爲我正。李爲副。李久欲謀我。缺不得隙。今遇爾。亦天也。我不過發配陝西三年耳。三年後公亦須來京。攷散館矣。黃河岸邊相見可也。方醒而大懼。請假歸。終身不復入京。此即方朝覲之父也。聞朝覲會試後。夢一人自稱胡某。與爾父相善。因爾父信讒。致我得罪。充徒三年。今歸。仍復舊職。聞爾能繼父志甚喜。然爾命中無進士也。何必跋涉哉。方夢中大哭。求轉圜。胡曰。無已。以壽算准折。或可。爾具二疏。焚于前門關帝廟。我再于冥冥中爲爾謀之。惟中後卽不永年。勿悔也。朝覲允之。故殿試後未卅月卽死也。朝覲爲光稷甫侍御。姊夫於方父子事言之甚詳。予至京。主其家。茶餘飯罷。輒以爲談資也。此豈中國人迷信之故哉。然而其事甚確。非空中樓閣也。